

28541/p

426001
74. 34
J. 121

De
**THERMIS
TRENTSINENSIBVS**

Commentariolus,
Historico-Physico-Medicus.

Auctore
D. Andrea Herrmanno,
Eminentissimi S. R. E. Cardinalis
Presbyteri EMERICI, e Comitibus
C S Á K Y de Keresztzeg, etc.
Personæ Medico.

Lipsiæ, apud Petr. Con. Monath.

M D C C X X V I.

KONINKL.
RIJKE
TE SHAGE.



Lectori Beneuolo,

S. P. D.

Andreas Hermannus.

Commentariolum, quem vides, de
Thermis Trenstinsibus, *Eminentis-*
simi S. R. E. Cardinalis Presbyteri,
Dn. Dn. EMERICI, e Comitibus Csáky de
Keresztseg, reliqua, iussu, longe gratiosissi-
mo, anno superiore, concinnatum, postea
vero, nouis adauctum obseruationibus, vt
iam publici iuris faciam, non me inanis stu-
dium gloriolæ, quæ in re tam exsili, propemo-
dum nulla est; sed publicæ vtilitatis, quam
vnice promotam cupio, rationes induxerunt.
Atque hinc est, quod non tam conquisiuerim,
quæ opusculo eruditionis laudem concilia-
rent, quam quæ ad eorum vtilitatem perti-
nere crederem, qui Thermis Trenstinsibus,

cum bona fruge, vti in posterum voluerint. Quorsum et ea diligentia, quantulacunque sit, pertinet, qua in naturam calidarum indagavi, curiosius forte, quam id, artis spagyricæ ignari, ferre poterunt. Nempe, adsentior, doctissimo viro, *PHILIPPO JACOBO SACHS a Leuvenheim*, alicubi scribenti: *Nulla curiositas homini christiano, magis digna contemplatione, rerum naturalium. Hæc, si Theologiam demas, omnium scientiarum præstantissima est; nulla latior, excellentior, placidior, utilior, immo, ausim dicere, diuinior.* Istud vero est, quod equidem, sicuti ciuibus meis, quibus hæc adyta rimari datum est, vniuersim; ita, cum primis, *Philosophiæ ac Medicinæ Doctores*, etiam atque etiam commendatum velim; vt, cum alia naturæ portenta, tum ea maxime, sub examen vocent, quæ augendæ in maius, ornandæque arti nostræ salutari, idonea esse poterunt. Siccubi enim terrarum, in *Hungaria* profecto nostra, cumulatissimus thesaurus existit, rerum, quæ ad

Histo-

Historia Naturalis pomeria, cum laude, pro-
roganda, pertinerent, si *Agricolas, Libanios,*
Gesneros, Rondeletios, Boëtios, Fabritios,
Scheuchzeros, et his consimiles viros, iusta
animi contentione, æmulari cuperemus. Sed
ista ego vota alibi explicatius: nunc id eru-
ditos patriæ nostræ, quam possum, vehemen-
tissime, rogitō, vt *Thermas* reliquas, fontes
acidos, et salutares, atque vniuersam, quæ in
Hungaria gignitur, *Materiam Medicam,* ob-
seruationibus suis, experimentis et lucubra-
tionibus, expromant, detegant, illustreatque,
inituri, apud orbem eruditum, gratiam, haud
contemnendam. Tu iam L. B. vale, hanc
nostram opellam, æqui bonique, consule; et
nostris conaribus faue. Scribeb. Pisonii.
M. DCCXXV. Kal. Septembr.

Balnea, cum Medicis, si quis componat, utrinque
Pernicies hominum, provenit atque salus.
Corrumpunt Baia, corrumpit et ipse Machaon
Corpora; sed servant, si sit utrique modus.
At servare motum, corruptaque reddere firmis;
Hoc est, hoc medicæ dexteritatis opus!
Ostendit nostras *HERMANNVS* utrumque;
quid obfit
In calidis, & quid conferat usus aquis?
Exemplum præbent, *Terentia Balnea*, quorum
Naturam, fructum, perniciemque dedit.
Pannonidum proles, lætare! nec vuida rumpent
Balnea, nec *Medicus*, corpora vestra magis.

In Memoriam Sui,
scribebat,
et quanti auctorem faceret,
palam testabatur,
amicorum nonnemo.

Mem-

Membrum I.

Historico-Chorographicum.

De

Situ, origine et Fatis Thermarum Trentsinensium.

Synopsis.

Thermarum Trentsinensium
denominatio : an a Teren-
tio Romano ? Notæ for-
tean fuerunt *Quadis* et *Marco-*
mannis §. I.

Sub *Hungaris*, quomodo in-
claruerint ? §. II.

Hominum nostrorum, in cu-
randis iisdem, negligentia, a
Iordano reprehensa : *Illustrissimi*
Comitis Jlyésbázy laudabilis de-
clinatio. §. III.

Thermarum situs amoenus :
aëris salubritas eximia. §. IV.

Jordani in eandem rem ver-
ba. §. V.

Quid in Thermis nostris ma-
xime importunum ? commodi-
tates quænam ? §. VI.

Quomodo se eadem *Iordani*
tempore habuerint ? eius rei
causæ. §. VII.

Lauacra a *Iornande* recensita :
iuxta eius querela. §. VIII.

Quomodo ea tunc facta fu-
erint, quæ eorum hodie sit fa-
cies ? §. IX.

Balneum commune. §. X.

Lauacrum ultimum. §. XI.

A quibus Thermae nostræ
in primis frequententur ? §. XII.

§. I

THERMAE TRENTSINENSES, ab vrbe cognomine, *Thermarum*
adpellationem sortitæ sunt. Si ita certum esset ex-
ploratumque, quam id sermonibus nostrorum per-
hibetur, *arcem Trentsinensem*, limitem olim Romani fuissetio :
Imperii, *Trentsi-
nensium
denomina-
tio :*

an a Te-
rentio Ro-
mano?

note fortas-
sis fuerunt
Quadis et
Marco-
mannis,

Imperii, a TERENTIO a) quodam, aduersus *Sarmatas*, con-
stitutum, atque *Turrim Terentii* nuncupatam; antiqua fo-
rent, non vrbis modo primordia, sed Thermarum etiam
nostrarum celebritas. Quia enim Thermis multum dele-
ctati b) Romani, in magno eas habebant pretio, non esset
ambigendum, legionem, quæ hic excubabat, curæ ha-
buisse, beneficium isthoc naturæ, nullo suo labore, sed so-
la loci opportunitate, sibi oblatum. Quomodocunque se
res habeat, fas est, existimare, innotuisse Thermas nostras,
simul montes isti, siue c) a *Quadis*, siue a *Marcomannis*, huic
oræ vicinis, habitari coeperunt. Atque tunc, nihil erat
procluius, quam vt Romanorum armis, partim domitæ,
partim reiectæ longius gentes istæ, opportunitates suas,
incultas licet, et situ foedas, succedentibus sibi rerum Do-
minis, relinquerent, quas Romani circa stationes suas, eti-
am temporarias, egregie sciuerunt in rem suam conuer-
tere.

§. II.

Hæc, coniecturæ sunt, quas nobis suppeditauit vr-
bis *Trenstinensis* denominatio, ad illam canam ætatem re-
lata.

-
- a) Ita Tyrnauenses eruditi Celebriorum Hungariæ urbium et
oppidorum P. II. *Trenstinum* antiqua legionum Romanorum
statio fuit, aut colonia, si vnciales literæ latine nunc temporis
etiam in arce leguntur.
- b) Vide Iustum Lipsium, de magnitudine Romana. Lib. III, cap.
VIII.
- c) Confer omnino præter CHRISTOPHORI CELLARII sum-
mi viri, Notitiâ Orb. Antiqu. P. I. Lib. II. c. V. p. 486.
Illustr. FRIDERICI WILHELMI de SOMMERSBERG,
Regnum Vannianum, Cap. IV. p. 24. sq. vbi, hanc regio-
nem, *Quadis* admensam, leges.

lata. Tametsi vero haud multum nostra interest, fuisse, vel minus, istis locis aliquando Romanorum colonias, quia tamen habet iucunditatis nonnihil, antiquitatem istiusmodi vestigatio; non erat, hoc, quidquid est, coniectationis, silentio prætereundum. Postea, cum *Hungari*, rerum potirentur ex regionis vicissitudinibus, fata quoque Thermarum nostrarum perpendisse, nemo temere inficiabitur. Immo exScriptorum, qui res patriæ sunt profecuti, silentio, colligi quodammodo potest, latuisse eas, prima illa Hungarorum ætate, saltem habitas negligentius, ad CAROLI I. tempora, quibus late hac regione dominabatur d) *Matthæus Trentsinensis*, opibus adeo valens, ut Regis imperia pertinaciter aspernatus, nihil dubitarit, belli, aduersus eum, fortunam experiri. Tunc enim in pretio esse coepisse calidas Trentsinenses, non ab re fortassis existimauerimus. Sed reuera, ignobiles mansere, donec *Comites de Zápolya*, arce, et ditione vniuersa potiri, iidemque elegantiae, pro opum magnitudine, multum dediti, non arcem modo nouis ornarent operibus, sed circumpositam etiam regionem, atque in thermas, nouo cultu, redderent illustriorem. Istud est, quod WERNERVS e) memoriae prodidit: *Sunt calidae aliae, non longe a castro Trentsinio quod ad eiusdem fluuii Vagæ ripam est, supra Galgótziüm. Illæ suauiter calent, et sunt limpidissimæ, et ideo iucundissimi secessus loco fuerunt Comitibus Scepusiensibus, qui paullo superiore ætate sedem ibi habuerunt.*

B

Erant

Sub Hungaris.

quomodo inclaruerint?

d) *Bonfin. Dec. II. Lib. VIII. p. m. 317.* Totus hinc Tractus, qui a Danubio, aduerso Vago, vsque ad eius fontes, procurrit, *Mátyás Földe*, quas dicas: terra, siue prouincia *Matthæi*, vocitabatur, vid. *Tyrnanienses eruditos* loco nunc citato.

e) De admirandis Hungariæ aquis,

Erant autem Scepusienses Comites, Zápolitani, quos *Thurzones*, in opima illa hæreditate exceperunt; istos *Forgátschii*, atque *Jlýés-házii*, non minus diuites, et ad omnem magnificentiam compositi: ut mirum sit, opulentissimas familias, nihil solidi operis, quod accipiendis commode lauatoribus inferuaret, istie exædificasse.

§. III.

Hominum
nostrorum,
in curandis
iisdem, ne-
gligentia,

Jordanano
reprehensa.

Certe extraneus Scriptor, THOMAS JORDANVS f), egregie de *Thermis Trentsinensibus* commentatus, reperisse sibi visus est, cur hominum nostrorum, erga isthæc naturæ beneficia, duritiem quereretur, cuius verba subinde nostra faciemus: *Quantum*, inquit, *emolumentum*, calor iste *actualis* (Thermarum) *præbet*, *tantum dispendium videtur consequi*, *ex incommodis habitationibus*. Nam etsi sub tentoriis et papilionibus viuas, siue casas, tuguria aut tabernacula exstruas, *agere inclementiam aëris pluuii, aut ventis turbati, aliquando effugies.*

f) Inscribitur libellus: *Thomæ Jordani Clausoburgo, Publici Marchionatus Moraviæ Medici; De Aquis Medicatis Moraviæ, Commentariolus, cum indice copiosissimo. Francofurti. Apud hæredes Andreae Vechelii M. D. LXXXVI.* Idem iste IORDANI commentariolus, Bohemice prodiit, Olomacii, Anno MDLXXX. in 4to. Erat autem *Jordanus*, natione Saxo-Transiluanus *Claudiopolitanus*, patriam, quod ipse, in dedicatione gloriatur, in *Marcomannis* nactus: *Hac*, inquit, *commemoratione* (laudum *priscorum Marcomannorum*) *mibi ipsi gratulatus sum*, quod *diuino natu atque auspiciis*, tum etiam *V. Mag. et Gen. D. D.* (adloquitur quatuor Morav. Status) *vocatione*, bis *felicibus terris confederim*, quæ iam coniuge et liberis aucto, *tranquillo domicilio præbito*, patriæ vicem subierunt.

effugies. Non semper serenat Jupiter. Tum, qui remotius a balneo tentoria fixerunt, inter eundem, et redeundum fieri nequit, quin aëri sese exponentes, vim aliquam cuti inferant, poris cutis apertis, et facile obuium aërem, qualiscunque is fuerit, excipientibus. Hoc etsi non videatur magni momenti, cum lauantes id facile laturi videantur, neque manifestum illinc quisquam senserit detrimentum: equidem, si quis potare voluerit aquas, non video, quomodo canones supra traditos hic observare possit. Hæc ille, ac paullo ante: Supina, inquit, negligentia habitatorum culpanda, quod nihil in locum exornandum pensi faciant: de quo cum quereretur, responsum accepi, vici pagi colonos, Pannoniæ Regum beneficio, ius thermarum et dominium possidere, qui præ egestate, et quod latrociniiis locus esset infestus, nihil sumptuum in eas exædificandas conferre, aut possent, aut vellent: neminemque alieno solo, inuito possessore, aliquid sibi usurpare debere, legibus cautum esse. Scripsit ita IORDANVS, ante annos CXLV. bene thermis nostris ominatus: Ut tempora, inquit, mutantur, et nos in illis, fieri potest, ut quos de patria bene merendi studium, aut alias levis gloriola, stimulauerit, aliquid sumptuum et opis in exornandum locum conferant: vel Mahumetanorum exemplo ducti, qui balnea publica, et Carauasarias, sua inquam xerodochia, in usum peregrinantium et viatorum splendide exædificant, ubi gratis pabulum pro iumentis præbetur, et aquæ limpidissimæ, etiam e locis quam longissime remotis, in usum hominum et in mentorum, ingentibus sumptibus, tubis et canalibus deducuntur. Lætaretur, credo, isto suo omine, si viueret bonus IORDANVS, audito, Illustrissimum Comitem Iosephum Illyésházy, curam hanc, optimo consilio, iam occupauisse, ut et lauacra instruantur emissariis, et ædes, accipiendis hospitibus, quam primum excitentur, commodæ, ac temporum ingenio et decori, responden-

Illustrissimis
Comitis Il-
lyésházy,
laudabilis
destinatio.

tes, quæ quidem destinatio, g) vt feliciter, quam primum, succedat, tam optamus auide, quam qui sumus sanitatis ægrotorum cupidissimi.

§. IV.

Thermarum
situm amœ-
nus:

Aëris salu-
britas exi-
mia,

Diffident TRENTSINO, thermæ nostræ, vulgo *Tepliz* dictæ; (nam eo nomine, calidas, *Slavi* insigniunt) *sesqui milliari*, ultra vicum *Tepla* amœno situ, intra montes positæ, qui parte altera, ab arce *Trentsin*, altera a vico *Tepla*, lento primum fastigio sese adtollentes, in altiora iuga adsurgunt, atque ita obsident thermas, vt ex industria circumpositos crederes. Adeuntur ab occidente, quasi per fauces quasdam; reliqua montibus incincta siluosis, eaque re, adspectu iucundis. Riuus ab oriente demissus, idemque adlapsus thermis, aquas earum accipit, ac per vallem, quæ in occidentem vergit, deiectus, *Vago* hauritur. Aëris temperies, iis in primis temporibus, quæ sunt lauationibus destinata, hoc est, adulto vere, atque autumno in-
eunte, saluberrima existit. Fit hinc, vt lauantes, non aquarum modo singulari efficacitate, præclare adiuuentur, sed aëris quoque salubritate, mirum in modum recreentur.

§. V.

Iordani, in
eandem
rem, verba,

Concordat IORDANVS. Nobile, inquit, *Pannoniorum* oppidum est *Trentsinium*, comitatu, arce munitissima, ad *Vagi*, rapidissimi et amplissimi fluminis ripam, Saxo precipiti imposita, conspicuum. Magno illinc milliari, aquæ callidæ, quas *Morauicis*, ob viciniam, adnumerare libuit, cum a nostris hominibus frequententur, immo e *Silesiis*, *Boemia*, extrema denique *Sarmatia*,

g) Dum hæc scribimus, nuntiatur nobis, diuersiorum, egregio substructum opere, ferme consummatum iam esse.

matia, cateruatim eo confluere solent agroti. Aëris mira temperies, locus salubris, situs, intra Carpathos montes, amœnus, vallis non conclusa, sed occidentem et septentrionem versus, patens, annonæ summa vilitas, piscium, volucrum, omnium denique fructuum æstiuorum, copia, illecebras eo profecturis non leues porrigeret, nisi prædonibus, et latrunculis (quod in contiguarum prouinciarum limitibus plerumque accidit) siluæ, qua hinc trans-eundum, obsitæ essent, qui viatorum bonis, sepe et vita, insidias struere solent. Quod Pannoniæ dicit oppidum Trentsinum, cum vulgo loquitur IORDANVS, eo, quod Pannonia tota trans Danubium sita; Marcomannorum, contra, Quadorum, Jazygum, et Dacorum regio, cis flumen, ab occidente in orientem, proiecta fuit. Neque est, quam ob rem hodie latronum insultus reueraris, cum ea sit temporum, quæ regnante CAROLO VI. opt. Max. degimus, felicitas, vt non modo foris, tuta sint omnia, sed et domi cunctare-foueant pax et tranquillitas publica. Tantum est, sub bono principe, viuere.

§. VI.

Illud multum loci derogat opportunitati, quod, sicuti ^{Quid in Thermis nostris maxime importunum?} supra IORDANO præeunte, questi sumus, ædificiis, quæ ad tam efficaces aquas exstare oporteret, laxis, capacibus, satisque commodis, careat. Nimirum, vnica tantum hic visitur domus, e lapide substructa, binæ, e tignis, quomodocunque materiatae. Et hæ, accipiendis eminentioris dignitatis hospitibus, destinatae sunt, quorum, si plures ad-sint, quod lauantium est reliquum, per casas rusticanas dispertitum est. Rusticorum porro ædes, humiles sunt, et ex depresso loci situ, humidæ, adeoque lauantibus, quibus sicca esse oportet conclauia, noxiæ. Hoc, quidquid est com-

Commodi-
tates quæ-
nam?

moditatis, *floreno* in singulas hebdomadas, redimi consuevit. *b)* Diuersorium, elegantioribus iam cubiculis instructum, non tam lauantibus dicatum hucusque fuit, quam *vino*, et *cereuisiæ* vendendæ, vbi rusticum vulgus, si *Festi dies* incidant, agendis choreis, et comestationibus, ex more, indulget. Annonam, habitantes circum agrestes, affatim suggerunt, paruo venientem. Si quid, præter quotidianos vsus, mensæ requirant opimiores, ex vrbis id petitur, leui negotio. Vnde et *Medicum* arcessere et *pharmaca* promere possis, ex officina *Societ. IESV*, præclare instructa. Neque dulcium aquarum silendus fons est, qui saluberrimo latice, ad montis pedem scatet, culinæ, iuxta et potui, longe commodissimus. Lapidis ei quidpiam inesse, inde coniecimus, quod aqua recens hausta, atque *Ole. Tartari, præcipitata*, colorem induerit albicantem. Sed nec riui præterlabentis aquæ, insipidæ sunt. Nam et trutas alunt, et ab his, quibus molestum est, ad fontem, aquatum concedere, antequam cum aqua thermarum commisceantur, rei coquinaris, non minus, quam potui, adhibentur. *Acidula*, ex vicino agro, huc adlatæ, palustris sunt saporis, ingratosque cientes ructus.

§. VII.

Quomodo se
eodem Ior-
danis tem-
pore habue-
runt?

Neque fere aliter *IORDANVS*, loci opportunitates, quales suo tempore fuerunt, descripsit: *Ad thermas*, inquit, *vbi peruentum est, ædificia prope nulla, ea, quæ exstant, trabibus, tignis, ligno inquam solo, concinnata, tecto solo superposito, et ea ruinam minantur, ventis ubique peruia. Publicum tale*
diuer.

b) Jam, quod celebriores incipiunt esse *Thermæ nostræ*, non cubicula tantum; sed annona etiam, cariore pretio, comparatur,

diuersorium, casa rustica adiecta, tum egenis locus dicatus, quo a cœli iniuriis aliquantisper immunes esse queant. Mensibus Maio, Junio, et sequentibus, quibus thermarum vires efficacissimæ habentur, maiorque hominum fit concursus, Proceres, Magnates, et equestris ordinis viri, tentoriis, spatiosissimo prato, fixis, vitam ducunt. Vulgus hominum virgultis, cratibus vimineis, et frondibus, (quarum materiam siluæ abundantissime suppeditant) tectis sese occulit. Exercitus castra illic esse diceres. Mendicorum, stipem flagitantium colluvies, hic visitur, qui tamen mensibus lauationi dicatis, solum vertere, et melioribus locum dare, coguntur. Annona, e vicinis pagis, quæritur, aut eo a rusticis comportatur, vel ex vrbe petitur. Fonticulus aquæ dulcis, suauis et gelida aqua, tam ciborum præparationi, quam potui refrigerando, subseruit, licet non procul abhinc riuulus præterfluat, eandem præstiturus utilitatem, nisi eo aquæ thermarum corriuarentur. Hæc cum nostra, quam supra exhibuimus, descriptione, conueniunt, præterquam, quod hodie, commodius iam, et habitari heic possit, et lauari. Ceterum, mirandum haud est, incultas adeo sub id tem-^{eius rei} pus fuisse Thermas nostras bellis Turcicis, optimas plerum-^{caussa.} que destinationes, interuertentibus. Neque enim eadem est Hungariæ, quæ regionum, remotarum a belli periculis, felicitas. Cum enim illic, si quid solidi excitetur operis, in posteros id, sine offensa duret, nouisque subinde augeri possit substructionibus; hic sæpius vidimus, eodem lustro, non ædes modo priuatas, sed castella etiam, omnium cum apparatu, excitata, iuxta et deleta fuisse. Quin et eo Thermarum opportunitas, Jordanæ ætati præstat hodie, quod templum habeat, atque antistitem, sacra ritu Romano-Catholico, facientem: cum contra Protestantes, qui heic lauare solent, in vrbe Trentsinensi, sacris suis operari consueuerint.

§. VIII.

*Lauacra a
Iordane re-
censita:*

Lauacra, cum IORDANVS heic fuisset, pauciora exstiterunt, quam hodie sunt: Loca, scribit ille, balneis destinata, sunt duo: aluei sat ampli utrobique, et hi, vix decem passibus, a se diuisi. Prima auctoritatis hominibus, prior est dictus, alter plebi promiscue, utriusque sexus, nullo habito delectu: cuius, etiam fœda scabie laboranti, patet ingressus quem egenorum balneum indignant. Est omnino, cur indignetur IORDANVS, sanis, iuxta et fœda scabie infectis, promiscua heic esse balnea. Quis enim balneum sibi pollicebitur salubre? vbi abluta ægrotorum sanies, passim thermarum aquis iactatur, atque corporibus adhærescit, subinde, multum ab hac contagione, abhorrentium. Sed quia consuetudo isthæc pridem inoleuit, frustra eam increpereris, nisi adsint, quorum auctoritatem reuereantur lauantes. Nescio enim, quo malo errore sibi persuadeant multi, sicuti communia hæc istiusmodi naturæ beneficia esse, ita, pro cuiusuis lubitu, vti iis omnibus, et cum aliorum offensa, licere: reuera, ac si intemperiei, non vero salutis hominum, munifica illa parens, consultum voluisset.

§. IX.

*Quomodo
ea tunc fa-
cta fuerint?*

Pergit, in lauacrorum sui temporis, opportunitate describenda, IORDANVS. Gradibus aliquot in lacum descenditur. Pavimento carent uterque Stratum nolunt, duplici de causa; vel quia negant, assensibus, seu tabulis, si sternentur, tam calidam erepturam esse aquam, impediante videlicet pavimento; tum, si quis calidiorem postulauerit aquam, summis pedum digitis, si arenulas scalpserit, illico feruentes aquæ, bullas subsultare, et recta sursum ferri sentiet, quod si sapius reiterauerit, longe calidorem comperiet aquam, quam si quietus et immotus, eodem loco

loco perstiterit. Sic ille; ego vero illorum temporum habitui, hoc, quidquid est, incuriæ, adscripserim, quo multo indigentiores, quam hodie sunt, istarum rerum fuisse, homines, certum est. Nolim tamen inficiari, multum calori aquarum posse accedere, si arenæ subtus nativo feruore calefactæ, pavimenti sint loco. Hodie, longe alia lauacrorum est facies. Tria horum sunt. Primum *i) Dominorum* qua eorum hodie sit facies? vulgo dicitur, quod præstantioribus viris, et foeminis, destinatum est. Huius ædes, e cæmento substructæ sunt; alueus contra, ligneis parietibus, atque pavimento, contabulatus, quin et cancellis incinctus, in longitudinem ad octo circiter orgyias, ad tres et mediam, in latitudinem porrigitur, vlnas duas profundus, ad eum tamen modum factus, vt, si obturetur aquarum defluxus, altius, et pro staturæ lauantis, portione, inundari possit. Parietes, scamnis, gemino ordine, circum sunt instructi. vt pro lubitu altius, depressiusue, confidere queant lauantes. In primis, multum ad lauacri oportunitatem confert emissarius canalis, quo aquæ educi e balneo poterunt, quoties id e re lauantium esse creditur. Hoc vero; qui ex medicorum præscripto thermis nostris vtuntur, singulis diebus, bis faciunt, mane primum, tunc vero sole meridiano: aquis trium circiter horarum spatio, iterum, iterumque, ad pristinam mensuram redundantibus. Et hac quidem re, dici nequit, quanto opere instaurentur calidarum vires, quippe, nouis subinde aquis, natua *impregnatis* salubritate, succedentibus. Vt non perperam id, circa thermas nostras, desiderauerit olim IORDANVS. *E procerum, inquit, balneo, nihil quidquam profuit,*

C

i) Hungaris: *Az Urak Hévíze*; Germanis: *Das Herren Bad*.
Slavis: *Panské Teplice*.

fluit, quia caret emissariis, seu canalibus, quibus obices aquarum reclusi, aquae exitum concederent: Ita eadem semper perseverat aqua, quae, quin exhalet, tum etiam sordibus scatcat, fieri nequit, nisi calorum aut lixarum opera, Procerum iussu (quod interdum, sed raro evenit) urnis aut culeis funditus exhauriantur, et hac ratione aliquatenus expurgentur. Aetate celeberrimi CAROLI RAYGERI senioris, Med. Doct. et Pract. Posoniensis felicissimi, cultius extitit. Enimvero, affabre factis contabulationibus incinctum, atque scamnis instructum fuisse, k) scribit. Primum, inquit, erat tectum, cum scamnis ligneis, affabre factum. In medio balnei erat scopulus quidam, parvus rotundus, non supra aquam eminens, unde etiam germanice vocabatur: Das Selsen-Bad. Infra non erat tabulatum, sed balneantes deambulabant in arena. Adhuc scopuli huius meminere accolae. Pueris ille tenerioribus, solum praebebat, si quos in thermas parentes intulissent, iucundo omnino spectaculo. Vicini quoque lauacri meminit RAYGERVS. Contiguum erat alterum eiusdem qualitatis et conditionis, tantum materia lignea distinctum. Atque eo situ, ad nostram usque aetatem, thermarum iste alueus, perduravit, quem, ad eum, quo iam est, modum, et contabulari, et emissario instrui curavit, Illustrissimus Comes a Salm, cum partem ditionis Trentsinensis, aliquandiu tenuisset. Tunc quoque scopulus, quem diximus, disiectus, atque geminus alueus, in unum, eumque ampliorem, coadunatus est, qui, quod ob commoditates recens factas, a primoribus frequentari coepit, balnei Dominorum obtinuit adpellationem. Innuit hoc iterum RAYGERVS: Nunc, inquit, mutata esse omnia audiui, postquam

k) In MSCptis notis ad Georgii Werberi, de admirandis Hung. aquis,

postquam in manus Domini Comitissæ a Salm venit, qui illa duo balnea prima, coniunxisse, rupem abstulisse, totumque asseribus sterni curasse fertur. Geminum porro hypocaustum, lauacro coædificatum visitur, vbi vestes indui possint balneatoriae, atque iterum poni: quod vtrumque, si aura sit frigidior, calefieri solet.

§. X.

Hinc *Commune* est balneum, l) vno quidem tecto, atque iisdem ligneis clausum parietibus, sed bipartito diuisum. Plebi id promiscuæ patet, quapropter et apparatus eo, quo prius illud instructum haud est. Nam et emissariis caret, et pauimenti loco, arena vtroque est. Aqua superflua, per canalem exit, thermarum superficiei respondentem. Vtriusque lauacri idem est spatium, orgyias circiter tres et mediam longum, sed tres admodum latum. Istud esse crediderim, quod pauperum adpellat IORDANVS, sed iniquius tunc habitum. *Pauperum*, inquit, *balneum*, *nunc ex industria, factum sit*, dubito. Puta, ob sitis, quo tunc erat, squalorem, et male materiatorum parietum ruinam.

§. XI.

Supereſt, m) vltimum lauacrum, medio loco, inter primorum illud, et plebeiorum, positum, sed aquarum tamen calore, multum remissius vtroque. Ipse alueus, ad eum modum factus est, qualem ad plebeias Thermas vidimus, nisi quod heic quoque, sicuti in *Nobilium* balneo, pauimentum asseribus passim perforatis,

C 2

l) Hungari: *Közönséges Héviz*, vel, *Parasztok Héviz*; Germani: *Das gemeine*, siue, *Das Bauern-Bad*: Slaui: *Sedlácké Teplice*, vocitant.

m) Plures vero sunt scaturigines, quæ, si curarentur, noua præbere possent lauacra reliquis, nihil, credo, deteriora,

tis, contabulatum, atque alueus, circum, cancellis incinctus est. Aediculam quoque habet, adparatui balneatorio destinatam. Nullam lauacri huius mentionem facit IORDANVS, credo, quod nondum exstitit. RAYGERVS contra *balneum Comitum* adpellat. *Tertium*, inquit, *erat similiter tectum, infra tabulatum, scamnisque ligneis instructum, quod Comitum, seu Dominorum, das Herren-Bad, vulgo vocabant, sed longe remissius calebat, hinc parum ab incolis, aut aduenis aestimabatur, tantumque inserviebat Domino terrestri, (qui tum erat Illustrissimus Comes Georgius Illyesházy) aut delicatioribus feminis ac personis.* Iam prærogatiua isthac caret, neque, nisi cum æstus intensior est, aut ab his frequentatur, qui ob teneriorem corporis habitum, lubenter lauant temperatius. Sunt, qui definitum balnei tempus, emensi, ultimo, isthic lauent, vt cutem eluant. Cetero quin, plura multo lauacra constitui possent, si, aut vsus id posceret, aut essent, qui in eam rem sumtus vellent facere: certe, aquarum venæ, passim scatentes, haud defunt.

§. XII.

A quibus
Therma no-
stra in pri-
mis fre-
quententur.

Ista, de *Thermarum Trentsinensium*, origine, fatis, situ, atque opportunitatibus, dicere habui, tractioni residuæ, aditum quodammodo præstructura. Nunc, silendum haud est, a quibus calidæ nostræ, in primis frequentari soleant. Certe enim multitudo salubrium aquarum, quibus luxuriat Hungaria, difficilem earum facit electionem, non his modo, qui iis, curandi corporis gratia, vti constituerunt, sed ipsis quoque Medicis, quorum est, de aquarum medicarum efficacia, iuxta et habitudine, ad hos aliosue morbos, seu leniendos, seu domandos, maturo consilio, dispicere. Proinde, Thermis nostris, præter circumpositæ regionis incolas,

incolas, statis temporibus, examinum ritu conuolantes, in primis utebantur. *Posonienses*, qui olim, cum essent lautiora tempora, partim, ut se aduersus familiares morbos prae-munirent, partim, ut depellerent inueteratos, agminatim huc commigrabant. De his dicto loco RAYGERVS: *Celebres, inquit fuerunt haec thermæ semper, pacificis regni temporibus, a nostris (Posoniensibus) multum frequentatae, atque successu optimo, in variis adfectibus, adhibitæ. Noui hic locorum feminam seniculam, quæ singulis annis, illuc se contulit, neque longinquitate viæ, (distat quippe Posonio XIV. milliariis;) neque difficultate itineris, se deterreri permisit. Hodie, quia angustior plerorumque res est domestica, earum vsui, illinc Nemet Oxáriensem, hinc autem, Szent Györgyensem fontem haud sine fructu, multi substituunt. Maxime vero tota hac regione, nobilissimi quique Viri, annuo, calidarum Trentsinsium, vsu, delectantur; siue reuera medicationis, siue, quod plerumque fit, fallendi temporis, causa. An vero, quod supra ex IORDANO monuimus, Bohemis atque Polonis, frequententur adhuc, nequeo adfirmare: saltem rarius id iam fieri, certum est: cum Silesiæ quidem, Hirschbergensibus, Carolinis, Bohemi, intra regionis suæ fines, uti malint. Morauici certe, n) tamquam viciniore, in deliciis eas habent. Ambigendum vero haud est, si, quo decet, adparatu instruerentur thermæ nostræ, et accipiendis aduenis, ædes excitarentur sufficientes, atque commodæ, maiorem breui, quam, qua fuerunt hucusque, celebritatem consecuturas fore. Sed cum accidat subinde, ut non postremæ di-*

C 3

gnitatis

n) Jam et Austrii, atque in his Viennenses, vno alteroue salubritatis documento, illecti, huc commigrare occipiunt. Feliciter!

gnitatis viri, ad rusticas casas relegentur, fit, vt ita habiti semel, difficilius postea, neque, nisi coacti necessitati, redeant. Non video autem, cur ad procurationem istam, nequiret, sicuti apud exteros, quin et *Budenses* nostros, in more positum est, modicus aliquis census, pro lauacrorum, iuxta et lauantium, diuersitate, præscribi: ex cuius demum redditibus, nouæ subinde excitari subtractionibus, priscæ autem sartæ tectæque possent conseruari. Equidem, probe cognitum habeo, quantopere has impensas fastidiat vulgus nostrum, quamque imprecetur his, qui vel mentionem istius modi destinationis iniiciant; neque tamen despero, fore, vt, si viderit, rite ista omnia collocari, atque thermarum vsum reddi augustiorem, penitus adsuescat, eoque postea æs istud balneare impendat lubentius, quo id nunc peruicacius auersatur. Quod enim ad conflandam, huic instituto, inuidiam, adfirmant aliqui, constituto olim balneatico, plebis imprecationibus, calidarum nostrarum venas, partim exaruisse, partim ignauas fuisse redditas, id quidem merito inter fabulas reponendum est, quas superstitiosum vulgus, optimis quibusque institutis, ne his se reddat obstrictum, consuevit adspargere o).

Mem-

o) Simile quidpiam, de *Badensibus Thermis*, quæ sunt ad pedem montis *S. Gebhardi*, narrat *Excellentissimus Laurentius Stocker Thermographiæ Budens. Cap. VIII. §. 8. p. 51.*

Membrum II. PHYSICVM.

De Natura Thermarum Trentschien- nensium.

Synopsis.

Vtrum Thermarum nostrarum
indoles, quidpiam ex loci na-
tura participet? §. I.

Calidarum limpeditas; an color
earum *thalassius* dici possit? laua-
crum *Dominorum* quem referat co-
lorem? vniuersim, color therma-
rum nostrarum inconstans est,
quod male astrorum influxui tri-
buitur: vera eius rei causa: ratio
caloris vnde repetenda? §. II.

Caloris temperamentum, blan-
de ac mire: lauantium hinc lu-
xuries, valetudini nociua: calor's,
pro lacuum varietate, diuersitas:
causae eius rei, ex mente *Iordani*:
ratio vera §. III.

Odor *sulphureosus*: concordat cum
eo sapor: vtriusque diuersitas, pro
tempestatis ratione, intensior aut
remissior. §. IV.

Experimentum puluere, quem
calidae deponunt factum. §. V.

Liquoribus probatoriis ex-
ploratae aquae, quomodo se-
gesserint? §. VI.

Destillata per *alembicum*,
sulphur olebant: incoctae ad
vinae mensuram, quantum
dederint residui? §. VII.

Residuum e balneo *Domi-
norum elixiuatum*, saltem lu-
teolum, praebuit: huius exa-
men. §. VIII.

Idem residuum, igne lucu-
lento destillatum, qualem
dederit liquorem? *residuum*
lauacri Pauperum, eadem via
exploratum: balnei frigido-
ris itidem: liquorum inde
acceptorum examen. §. IX.

Eorundem liquorum *caput*
mortuum, sal exhibuit, duum
generum: horum examen:
Novum residui experimen-
tum. §. X.

Ex

Ex quibus rebus consistent
Thermæ nostræ, IORDANI
sententia: refellitur ab Auctore.

§ XI.

Sulphur, et *Sal communis*,
thermis nostris insunt: *Sulphu-*
ris indicia.

§. XI.

Sal communis Thermarum
Trentschinensium: tria, in re-

gno Minerali, acida: salium ex
his genesis.

§. XIII.

Salis communis quantitas: e-
ius indicia: carent thermæ no-
stræ *alumine*, *nitro*, *marie*, *sole*,
luna.

§. XIV.

Quomodo *sal communis* et
amaricans, cum *sulphure* et *terra*,
coniungi possit, disputatur. § XV.

§. I.

Utrum
Thermarum
nostrarum
indoles
quidpiam
ex loci na-
tura par-
ticipet?

IAm ad contemplandam aquarum nostrarum indolem,
veniamus. Et naturam quidem loci, quod in isto ex-
amine primum esse oportet, scrutantibus, nihil occur-
rit, cum thermis nostris commune, ex quo, de aquarum
ingenio, possis iudicare: si montanam atque petrosam re-
gionem excipias. Terra enim rubella, *bolum* quodammo-
do mentiens, quam passim notauimus, nec quidquam ad
indolem calidarum nostrarum confert. Atque inde, haud
ab re coniecimus, profunda esse oportere scaturiginum ca-
pita, neque tam ex regionis natura, quam ex habitu mea-
tuum subterraneorum, æstimanda. Enim vero, non hic,
sicuti in thermis aliis, canalibus, in alueos deriuantur aquæ,
sed eodem loco, bullitu haud inamœno erumpunt, ubi al-
ueos depresso conditores; quod, sicuti lauantibus iu-
cundum est, ita ad salubritatis, quæ aquis inest, laudem per-
tinet. Fieri namque aliter nequit, quam, ut multum effi-
cacitatis amittant aquæ, per ductus longiores, deriuatæ,
maneant contra ea salubriores, si eodem, quo scaturiunt,
loco, ipsa quoque lauacra, constituentur.

§. II.

§. II.

Aquæ lauacrorum omnium, limpidæ sunt, et translucen-
 centes. *Thalassinas* vocat IORDANVS: *Balneum*, ait, in-
 gredienti, aquæ color visus est cæruleus plane, illi persimilis, quo
 mare, altum æquor nauigantibus, tinctum cernitur, qui aliis
thalassinus æ mari, etiam *Venetus* dicitur. Bene est, quod ta-
 lem fuisse visam dicat, reuera enim, vitro pellucidiores et
 candido, quale crystallinum est, haustæ, nihil quod Thalaf-
 sino respondeat colori, referunt, sed fontanæ cuius similes
 sunt. Interim, thermæ *Dominorum*, vbi in alueo increue-
 runt altius, colorem ex luteo subviridem, præ se ferunt,
 qui postea, stagnantibus aliquantisper aquis, turbatur, pla-
 neque euanescit. Enimuero ea est calidarum *Trentsinen-*
sium natura, vt nequeant diu natium colorem tueri, quod
 vulgo astrorum influxui adscribunt, atque statis horis fieri
 perhibent, mane quidem hora decima, post meridiem ve-
 ro, sole ad occasum inclinante. Sumsi id mihi negotii, vt
 curatius vicissitudini huic attenderem; sed statas horas,
 quibus limpidæ, turbentur, obseruare nequiui; quin im-
 mo, frequenti vsu didici, maturius immixtas calidas, ma-
 turius etiam turbari cœpisse, tardius contra, si hesternæ
 aquæ, serius emissæ fuerunt. Causa turbationis, tenuis-
 simum est puluis, quem solutum, scaturientes aquæ, ege-
 runt, atque iterum in fundo deponunt: quodque arefa-
 ctus, puluerem præbet minutissimum. Est is coloris ex
 albo luteoli, lubricus adhæc, vt pavimentum balnei subinde
 scopis necessum sit perpurgari, nisi vestigia fallere debeat.
 Ceterum, coloris, quem diximus, causam vestiganti, nulla
 occurrit verosimilior, quam *refractio luminis*. Profecto
 enim, iis eum rebus, vnice adscribere, quæ calidas nostras

Calidarum
limpiditas:
 an color
 earum tha-
 lassinus dici
 possit?

lauacrum
dominorum,
 quem refe-
 rant colo-
 rem?

uniuersum,
 color ther-
 marum no-
 strarum in-
 constans est,
 quod male
 astrorum in-
 fluxui tri-
 buitur:

vera eius
rei causa:

ratio colo-
ris unde re-
petenda:

constituunt, sicuti fecit IORDANVS, difficile est atque impeditum. Ita vero ille: *color inquit, suspicionem de alumine cogitandi peperit, cum neque ab aluminis colore valde alienus esset, accedente summa claritate; licet non defuerint, qui inter examinandum antimonio, vel plumbo albo tribuerent.* Quam hæc vero sint dissimilia, infra monstrabimus, vbi *etziologiam*, nostri, quod instituiamus, examinis, sumus exhibituri. Certe, si rebus, quæ thermas nostras ingrediuntur, *color* aquarum adscribendus est, sicuti quadam tenus debet omnino, meliori eum iure, *Sulphuri*, quam siue *Alumini*, siue *Antimonio*, siue denique *Plumbo*, quorum hic nec vola, nec vestigium exstat, attribueris. p)

§. III.

Caloris
tempera-
mentum,
blande ac
mitis:

lauantium
hinc luxu-
ries, valetu-
dini nociva:

Post *Colorem*, *Caloris* explicandæ sunt rationes. Egre-
gie IORDANVS: *Calor*, inquit, *aquæ blandus, mitis benignus, Viennensium superans calorem blandum ac mitem: non tam feruens, ut Carolinarum.* Hinc eximiam efficacitatis partem, in blando isto calore ponere. nihil addubitat: *Efficaciora*, ait, *et cumulatiora hic omnia sunt expectanda, ob blandum, mitem ac natium aquarum calorem. qui caloris nostri natui excitatio- ni et penetrationi, multum confert auxilii.* Nihil omnino aquarumstrarum calore siue temperatius esse potest, siue suauius, ita placide lauantium membra adficit, ut, nisi ægro sis corpore, quo plus laueris, eo magis lauandi cupiditate inardescas: id quod multos facere videas, quos non tam curandi corporis necessitas, quam lautitiæ, ad lauandum inuitant. Qui, quod nesciunt modum voluptati huic

p) Si ergo cum *Scholasticis*, loqui luberet, res, thermas nostras ingredientibus, *caussa coloris essent materialis, refractione autem luminis, formalis.*

huic ponere, subinde iacturam valetudinis faciunt. *Eque-
stris ordinis iuuenis Moranus*, scribit IORDANVS, *sat lauta re,
tum ibi lauabat, qui nouem horas continuas insederat; alter, ex
comitatu suo, totam noctem illic exegerat, aquis immersus, etiam
somnum capiebat, quem tamen, cum pranderemus una, viribus
adfectum, et cibum fastidientem, obseruauimus. Adeo, et
medicina, venenum esse potest, nisi ea recte vtaris. Ne-
que tamen eadem omnibus promiscuæ lacubus caloris est* Caloris, p
lacuum va
rietate di-
uersitas
*temperies. Thermæ Dominorum mitissime calent, et cum
quodam voluptatis sensu: intensius plebeiorum, quasi na-
tura, compactis corporibus, fomenta admouere voluisset
efficaciora, quod et IORDANVS obseruauit. Pauperum,
inquit, balneum, et calidius et efficacius esse, omnes vno ore præ-
dicant, quod Numini attribuitur: non tamen caret causa na-
turali. Tertium, quod inter vtrumque positum est, re-
missioris est caloris hinc vulgo, das kühle Bad, frigidum* causa eius
rei, ex men-
te Iordanis
*balneum, vocitant. Gradus, diuersi huius caloris, non tam
ex scaturiginum indole, quam alueorum habitudine, æsti-
mat IORDANVS. Quia enim, Procerum balneum, carebat
tunc emissario, pauperum contra, ob negligenter factum
lacum, temere difflebat; in eam iuit sententiam, dima-
nantibus aquis, nouarum successu. calorem simul et salu-
britatem, instauratam continuo fuisse, quod aliter se ha-
buerit in stagnante Optimatum lauacro. Ita est, potuit ea
ratione minui intendique calor aquarum; neque tamen ea
sola causa, diuersitatis illius, credi debet. Hodie enim, cum
iam canales emissarios habeat. Dominorum lauacrum, Ple-
beiorum contra, sola aquarum superficie, defluat: istud ni-
hilo secius, illo calidius est. Nempe, diuersæ scaturigines,
mixtim ebullientes, diuersam caloris inducant temperiem.
Atque id potissimum in Thermis Primorum, et balneo illo*

frigidiorē, obserues licet, vbi feruidioribus scaturiginibus, gelidæ sunt; quod nisi esset, *Dominorum Thermi*, calore haud crederent plebeiis. Habent enim venas feruidiores, in quibus illæ eminent, quæ proxime ad ianuam maiorem, scatent, atque sabulum, sine cessatione, egerunt. Quin et illud obseruauimus, temperatiores nunc, nunc iterum feruentiores esse solere.

§. IV.

Odor sulphureus:

concordat cum eo Sapor:

utriusque diuersitas:

Iam ad *Odorem*, quod attinet, *sulphureus* is est, in ipso vallis aditu, naribus aduentantium sese ingerens. Cum in *thermas tenditur*, aduerso proficiscentium vento, nares, pluribus *stadiis*, fætor sulphuris, excipit, obseruat IORDANVS. Atque hic quidem fætor, non est tam calidarum vaporibus adscribendus, quippe quos etiam lenis aura, facile disilcit, quam defluenti, per vallem, riuulo, qui thermarum aquas auehit, atque *sulphureum* illum odorem, longius propagat. Cum odore, saporis coniunctæ sunt rationes, nam et is *sulphur*, haud obscure, prodit, quod linguam, calidas gustantium, sensu exquisitiore adficit. Alioquin, aqua subinde libata, nihil, quod siue *salsuginem*, siue *acidulum* quiddam referret, notare potuimus. Interim non male IORDANVS: *Gustata*, inquit, *aqua*, tantum caloris præ se tulit, ut facile bibi possit, et præter *sulphur*, quo plurimum abundat, nihil adstrictionis linguae præbebat. Hactenus bene, quod vero, adstringentem illam calidarum vim alumini adscribat, infra, sub examen vocabimus. Ceterum, *odoris*, iuxta et *saporis*, diuersæ sunt in singulis lauacris, rationes. Nam *Pauperum* illud, vehementius redolet, sapitque; *clementius Primorum*; omnium autem lenissime, quod est inter utrumque, medium, quibusdam, *frigidiusculum*, dictum. Porro,

odor,

odor, et *sapor*, pro tempestatis ratione, intensior nunc est, nunc remissior. Nimirum, sudo vndique cælo, blanda sunt omnia; quod, si nubibus inducatur, et ad tempestatem subitam inclinet, non *odor* modo, sed et *vapor* exhalat crassius. Ceterum, haustæ e lacu, aquæ, quo in vase adseruantur diutius, eo, et redolent, et sapiunt, segnius, quod diffugientibus halitibus sulphureosis, tribuendum esse, nemo non videt.

pro tempe-
statis rati-
one, inten-
sior, aut r-
emissior.

§. V.

Supra monuimus, calidas, bis, quotidie, suapte perturbari, atque puluerem deponere, ex albo luteolum. Dedidi ergo, in primis operam, ut eius aliquid colligerem, experimentis seruiturum. Proinde, asserere, qui emissario præfigi solet, ne aquæ diffluant, protracto, tantum ei pulueris huius detraxi, quod *quartam* ponderis communis *partem*, æquaret. Octiduo post, reuisi asserem denuo, reperiique eiusdem pulueris *drachmas* circiter *duas*. Est is instar *lactis sulphuris*. Certe, lychno admotus, haud secus flammam concepit, quam *sulphur*. Duas, ex eo, uncias, cum cura *sublimavi*, quæ *florum sulphuris drachmas* septem, cum dimidia, *capitis autem mortui*, *drachmam* mediam, post se reliquerunt. Idem *caput mortuum*, insipidum erat prorsus, omnisque expers odoris, atque candens factum, parte *phlogista carboniformi* consumpta, ex albo, fuscum euasit. Ista pulueris illius natura fuit.

Experimen-
tum, puluerem
quod calidum
deponunt,
factum.

§. VI.

Calidarum indolem, non vna via indagauimus, quarum singulas indicare paullo explicatius, e re lectoris futurum existimamus. Et ad liquores quidem, quos *Probato-*

Liquoribus
probatori-
is, explora-
te aqua,
quomodo se
gesserint?

rios vocant, quod attinet, varie illi aquas nostras adfecerunt. Nempe, *Spiritu Nitri*, et *Vitrioli*, adfuso, ne quidquam de pelluciditate sua amisit; a *solutione Vitrioli, Martis, et Veneris*, turbidiuscula euasit; quemadmodum et a *solutione lune in aqua forti*, colore tamen luteolo, aquis inducto, eo-que segnius subsidente. *Decocto Gallarum Turcicarum*, tincta, mutari renuit; a *Spiritu salis armoniaci vinoso*, turbari occipiebat, lenis tamen, ei simillimum halabat, quem oua, gallinarum incubitu suffocata, adsolent. Sed nec a *solutione salis communis*, quidquam mutabatur: plusculum, a *solutione sacchari Saturni*; tunc enim turbata, aliquantum, serum lactis referebat; quam vicissitudinem, *oleum quoque tartari, per deliquium*, ei induxisse, obseruauimus, cum *sedimento* tamen albicante. Et ista quidem circa *Thermas Procerum*, notauimus. *Plebeiorum*, consimiles sunt naturæ; præterquam quod, *solutione lune, in aqua forti*, turbari eas primum, mox fuscas, denique et nigricantes, reddi aduertimus. Quorsum id quoque retuleris, quod adfuso aceto, vehementius, quam de *Dominorum*, diximus, foetuerit. Sed nec in tertio lauacro, discriminis quidquam notare potuimus, nisi quod *solutio vitrioli, Martis, et Veneris*, turbare visa est aquas, verum remissius: *solutio lune in aqua forti*, eum ad modum se gerebat, quem in rustico balneo vidimus, nisi, quod hic in fuscum turbata colorem, nequirit in nigricantem degenerare. Sicuti vero ab aceto adperso foetebat languidius, ita ex *solutione Sacchari Saturni*, nimio opere lactescebat.

§. VII.

Destillatæ
per alembi-
cum sulphur
olebant:

Aquæ, e singulis lauacris haustæ, et per *alembicum destillatæ*, foetorem sulphureosum secum vehabant, eædemque
folia

folia argenti recipulo iniecta, nigrescente colore, inducebant. Ne vero, quod fit, experimentum fallax, mihi ipsi quidem ante omnia, ego vero aliis, etiam inuitus, imponerem, urnam e lacubus singulis, diuersis temporibus, mane, a prandio, et vesperi, hauriri curauimus, quam demum mensuram, summo studio, ac diligentia, ipsi incoxiimus. Atque tunc, ex aquis balnei *Procerum*, residui albicantis *Vncias duas*, totidemque *Drachmas*; ex *Rusticorum*, *Drachmas* septem; denique ex *Frigidoris* balnei aquis, *Vnciam* vnam, *Drachmas* tres, nactus fui: et quidem, ex duobus posterioribus, coloris ex albo fuscii. Pars residui huius cum sale tartari liquefacta, ingestis simul carbonibus, nullum *Hepar sulphuris*, exhibuit.

incocta ad urnam mensuram, quantum dederint residui?

§. VIII.

Porro, eiusdem Residui e balneo *Dominorum* vncia media, probe elixiuata, salis luteoli, beneque sicci, grana XXIV; e balneo *Rusticorum*, grana XIV; lutei magis coloris; denique ex *Frigidiore*, grana XV. salis, ex luteo albi, saporis acris et amaricantis, præbuit. Quæ demum salia aquæ communi iniecta, nullo negotio soluebantur. Salis thermarum *Dominorum*, et *Frigidorum*, solutio mansit lutea; sed balnei *Plebeiorum*, in fuscum colorem degenerauit. Adfuso aceto destillato, non efferuescebant, lunam tamen, in aqua forti, solutam, præcipitarunt in coroueam. Eadem ista salia, Spiritu vini rectificatissimo, perfusa, alba euaserunt, Spiritu vini, luteum colorem attrahente. Qui tamen, nihil saporis sulphureosi, habuit. Igni iniecta, concrepuerunt, parte altera subtilissima liquefacta, altera autem, eaque potiori, manente carboniformi, quæ tamen igne admoto, iterum ex albo luteum colorem recuperavit. Denique, oleo vitri-

Residuum, e balneo Dominorum, elixiuatum, salis luteolum præbuit.

huius examen.

oli

oli rectificatissimo adspersa, *nebulam* exhalant albicantem, quæ adflatu fortiore, *increscit*.

§. IX.

His, summo studio, obseruatis, *unciam residui*, quod *thermæ Optimatum* dederant, vnam, per *retortam*, subdito igne vehementiori, destillaui, accepique liquoris, *drachmas* duas, sapore prorsus *empyreumatico*. *Drachmæ sex*, *capitis mortui*, quæ superant, coloris fuerunt albi, saporis autem *Salsusculi*. *Residuum* porro e *Plebeiorum* balneo, mensuræ *drachmarum duarum*, ad eum, quem diximus, modum, destillatum, liquoris consimilis, *drachmam* dimidiam exhibuit. Quod ab hac mensura mansit super, *drachmam* vnam et dimidiam, expleuit, *colore*, et *sapore*, prorsus retentis. Denique, *residui*, ex *Frigidior* balneo, *Drachmæ tres*, dedere liquoris *Drachmam unicam*, *capitis mortui*, *drachmis* duabus, post se relictis; colore tamen candidiore, quin et sapore magis salso. Liquor balnei *Optimatum*, *solutione Luna* in *aqua fortis*, tinctus, retinuit aliquantisper limpiditatem, mox tamen factus turbidulus, *sedimentum*, lento casu, deposuit, leue admodum, et subfuscum. Contra, balnei *Plebeiorum* liquor, eidem *solutioni* adfusus, e vestigio, eam perturbauit, præcipitauitque *sedimentum gryseum*.

§. X.

Istius, quem diximus, liquoris, *caput mortuum elixiuia-* tum, et in vapores actum, præbuit, ex *thermis Optimatum*, salis grana XV. ex *plebeiorum*, grana V. ex *frigidioribus*, grana VIII. Sal istud duum fuit generum; alterum, quod minorum *crystallorum* instar, suapte, forma quadrangulari, increuit; alterum, quod euaporato liquore, coaluit. Eadem

Idem resi-
duum, igne
luculento
destilla-
tum, qua-
lem dederit,
liquorem?

Residuum
lauacri pau-
derum, ea-
per via, ex-
ploratum.

balnei frigi-
dioris iti-
dem:

liquorum,
inde acce-
ptorum ex-
amen.

Liquorum
eorundem,
caput mor-
tuum, sal
exhibuit,
duum gene-
rum:

dem salia, oleo vitrioli perfusa, nebulas eructabant, illis simili-
 les, quas supra diximus, precipitaruntque solutionem lunæ in
Aqua forti, in sedimentum album. Denique, quod ex residuo
 thermarum nobiliorum supererat, Oleo id *Vitrioli* miscui,
 eaque ratione, cum cura destillaui; quo quidem labore,
 partim *Spiritus salis*, partim etiam *Spiritus vitrioli*, inde-
 ptus sum. Idem liquores, cum, sale *Tartari saturati*, in
 vapores acti, partim *sal commune*, partim *tartarum vitriola-*
tum, ex connubio *spiritus salis*, et vitrioli, natum, cum *sale*
Alcali, exhibuerunt: quæ singula proclive fuit, inuicem
 distinguere; quippe cum *sal* quidem *communis*, frigida im-
 missus, solueretur, atque *Tartarum vitriolatum* post se re-
 linqueret. *Caput mortuum*, soluendo, euaporando, crystal-
 lisando, *sal mirabile Glauberi*, siue *Catharticum* obtinui, idque
 iterum ex connubio *alcali salis communis*, cum *acido vitrio-*
lico. Terra, quæ elixiuato residuo, supererat, lenius calcina-
 ta, partim in albos pulveres abiit, qui soluti aquam calcis
 dederunt; partim igne subacta fortiore, vitrificata est.
 Idem, et circa arenulas, a copiosiore illa scaturigine, quæ
 in primorum balneo, proxime ad ianuam salit, egestas, ob-
 seruauimus.

horum ex-
 men:

nouum resi-
 duum experi-
 mentum.

§. XI.

Ex his, quæ hucusque diximus, facile rerum gnari
 conicient, quæ potissimum res thermas nostras consti-
 tuant. IORDANVS sulphur et alumen, in præcipuis habet.
Aquas Trentsinenses, ait ille, plurimis vaporibus sulphureis,
 eisque subtilissimis præditas iudico, quibus non parum sit etiam
 aluminis permixtum. Quam quidem sententiam, subiinde
 inculcat, ideo fortassis culpandus, quod non tam experi-
 mentis chymicis nitatur, quam vulgi narratiunculis. Pra-
 E ter

Ex quibus
 rebus con-
 stet thes-
 ma nostræ
 Iordani
 sententiæ:

refellitur ab
auctore,

ter sulphur, inquit, quo plurimum abundat, nonnihil adstrictionis linguae praebebat, quod confirmabat opinionem nostram, de alumine, conceptam, addita etiam communi lauantium sententia, et accolarum, a medicis praestantissimis procul dubio petita, qui sulphuri, alumen permixtum, referebant. Nos profecto, in aquarum sapore, nihil, quod gustantis linguam adstringeret, notare potuimus; sed neque vllum notauimus alumine vestigium. Verum, danda est venia homini peregrinatori, quod, siue noluit operosiores diligentiam, in natura aquarum exploranda, ponere, siue etiam festinabundus, haud potuit: quippe, qualicunque examine, pro illa temporum indole, contentus. Interim, recte se habent, quae de *Sulphure* copiosiore, monuit. Ceterum, nihil dicunt, qui, praeter *Sulphur*, et commentitium illud IORDANI *Alumen*, *Martem*, *Vitriolum*, et *Nitrum*, thermis nostris inesse, credunt, immo asseuerant.

§. XII.

Sulphur, et
Sal com-
munis, ther-
mis nostris,
insunt:
Sulphuris
indicia:

Nos, praeter *Sulphur*, *Salem communem*, in calidis Trentinensibus in primis obseruauimus. Et *Sulphuris* quidem praesentiam, non vno deprehendimus experimento. Primo enim, odor, qui nares etiam inuitorum ferit; *Sulphur* aquarum prodit: quod et *sapor* facit; sed eo discrimine, quod supra indicauimus, nempe remissius balnei illius temperati; fortius *Dominorum*, denique *plebeiorum* omnium fortissime. Postea, huc et illud pertinet, quod §. V. de puluere, in fundo aluei subsidente, monuimus, quippe qui ipsissimum est *lac sulphuris*, quo haud secus, quam *communis Sulphure*, lychnos, flammis concipiendis idoneos, tingere possis. Accedit, quod vapores, quos incocta aqua halat, quin et thermæ ipsæ, *lunam*, primo quidem luteo, atque inde

inde nigricante colore, inficiant. Hinc lauaturi mature prouident, ne vel suppellectilem huiusmodi, vel argento distinctas vestes, ad balnea adferant, quia usu didicerunt, infuscarid id omne, et liuidum colorem, ex vaporum adflatu, induere. Neque aliud foetor ille arguit, qui adfuso aceto, oua redolet putrefacta, quam quod immixtum thermis nostris *Sulphur* copiosum, esse oporteat; tametsi in aquarum euaporatione, non æque obseruatum. Enimuero, aquis in aperto vase decoctis *sulphureosa* earum pars, in vapores abit, ac dissipatur, vix vestigio sulphuris, in *residuo*, manente, quod præter nos, Excell. quoque STOKERVS q) obseruauit. Eius verba hæc sunt: *Memoriam subit illud, quod WILLIAM SIMSON in discursu Philosophice de fermentatione p. 10. et 11. teste ETTMÜLLERO ex BROWNE adducit et ita sonat.* „Eruditus Browne in suis itineribus, refert has obseruationes: sulphur, quod est in magna, abundancia in pluribus thermis continuo efflat, nec in iis, reperitur, si aquam thermarum euaporaueris: propterea, putabam magis rationale, extra aquam, quam intra aquas, inspicere: nam pluribus in locis, quæ erant super thermas, et qui recipiebant vapores thermarum, vidi sulphur, adhærere; et pro satisfacienda curiositate, canalem, per quem thermalis aqua continuo fluebat, aperiri curavi, Budæ in Hungaria, et meis manibus, ex superiori canalis parte, extraxi substantiam, vix a floribus sulphuris distinctibilem, qua pluras capsulas replere potui. *Quem autorem autoptica nunc instructus experientia, verissima scripsisse, testari possum.* Quodsi autem clauso vase destillentur aquæ, tunc sulphur lateribus *cucurbitæ* eatenus adhærescit,

E 2

quo.

q) Thermograph. Budensis, Cap. X, p. 69.

quousque id calor propulsare potuit, IORDANO etiam monente. Atque hinc est, quod ex *odore* et *sapore*, calidarum ferri quidem iudicium quodam modo potest, de maiori minoriue Sulphuris, quod eis inest, copia; minime vero demonstrari, quantum eius vrna, a nobis, cum cura, decocta, secum vehibat: saltem nobis, id factu, eo loco, difficile admodum visum est. Institui nihilominus eius rei et istud tentamen: *Mercurium* nimirum, aquæ thermarum immisi, qui nigrescebat quidem, *Sulphur* tamen omne, haud attraxit, quippe quum aquæ supernatantes, sulphureosum adhuc odorem spirauerint. Proinde, si qui præstiterint imposte- rum, quod nobis haud licuit, non nostram modo, sed eorum omnium gratiam sunt inituri, qui *Spagyricas* istiusmodi obseruationes, in deliciis habent. r).

§. XIII.

Sal com-
munis
Therma-
rum Trent.
sinensium:
tria, in re-
gno mine-
rali, acida:

Hæc, quæ diximus, *Sulphuris*, in aquis Trentsinensibus, præsentiam docent. Nunc de *Sale communi*, quem in iis deprehendimus, agendum est. Iuuat autem in limine præmonuisse, *tria*, in Regno Minerali, *Acida*, existere, s) quæ alias *Spiritus* dicuntur a chymicis. Primum est acidum *primigenium*, *catholicum* seu *uniuersale vitrioli*, siue *Sulphuris*; alterum *Nitri*, denique tertium, *Salis communis*, quæ duo, *primigenio* illi, atque *catholico*, originem suam debent. Quod si enim ex parte *sulphurea* seu *phlogista*, hoc est, in-

Salium ex
his genesis.

flamma-

r) Potuisset quidem *Lixiuum Alkali*, cum aqua thermarum incoqui, ubi *Alculi*, Sulphur, ex parte, detinuisset, ex quo iterum per *acidum* aliquod præcipitari solet, qua tamen diligentia, et tempus nos perlubebat, et occasio.

s) Vide iterum Excell. STOCKER, Thermogr. Budens, Cap. XIII. p. 84. sq.

flammabilis terra, putredinosa fermentatione, accedat, *primigenum acidum* illud, *acidum Nitri*, producit: *Acidum* autem *Salis communis*, tunc gignit, si terræ *Mercuriali*, siue *arsenicali*, ac si ita loqui lubeat, *Alcali volatili*, sese coniungit. Atque horum quidem, *primum* illud, gravissimum est fortissimumque *acidum*: *Secundum* leuius, ac volatilius: *Tertium*, omnium leuissimum, maximeque *volatile*: quemadmodum hoc eodem ordine, *primum*, duo *posteriora*, *secundum* vero, si vnum alteri adfundatur, *tertium* istud, expellat omnino. Porro, idem *acidum primigenium*, cum *Marte*, aut *Venere*, copulatum. *Vitriolum* generat; Terræ iunctum cretacæ, *Alumen*; *Sulphur* contra, si terram inflammabilem copiosiore; *Boracem* vero, si vitriformem terram, nactum fuerit; denique terræ *alcalinæ*, siue *alcali* coadunatum, *Sal Medium*, *Arcanum duplicatum*, *Tartarum vitriolatum*, et *Nitrum antimoniatum*, producit. Sed *Acidum Nitri*, quod secundi generis diximus, *terræ alcalinæ* s. *alcali* accedens, *Sal* efficit, quod vulgo *Nitrum* vocamus; quemadmodum *Acidum Salis*, cum iisdem coniunctum, *Sal commune*. Ita generata *salia*, (puta, vbi *alcalinæ* cuidam terræ, siue *alcali*, iungitur alterutrum ex dictis acidis) *Salia salsa*, vocare moris est.

§. XIV.

Atque *Sal* istiusmodi *salsum*, cum *Sulphure Communi*, thermis nostris inesse, ex dictis, nemo non videt. Certum, eius pondus adnotare eo proclivius fuit, quo fixior *Salis communis* natura est, quam *Sulphuris*. Dedit vero *vrina calidarum*, sicuti supra §. VII. monuimus, e balneo *Primorum*; *Drachmam* vnam, *scrupulos* duos, *grana* octo: e *Plebeiorum*; *Scrupulum* vnum, *grana* sex: denique e *Tempe-*

Salis communis quantitas:

rato: scrupulum vnum, grana octo. Eundem istum salem, duplicem fuisse, itidem, supra notauimus, fluidum alterum, alterum calciformem, atque ex amaro falsum. Id vero inde euenit, quod acidum Salis communis terræ, partim alcalinae salinae, partim calcariae, coniunctum, illic quidem in Sal commune falsum, hic vero in Sal falsum amaricans, abierit. Salis autem huius, quem diximus, plura iterum exstant documenta. Namque igni iniectus, crepitat, et crystallos quadrangulares, producit; oleo vitrioli perfusus, Sal mirabile, de quo §. X. iniecta mentio est, generat. Lunam in corneam, sicuti et solutionem Saturni, in Saturnum corneum, præcipitat, atque adfuso oleo vitrioli, in albicantes nebulas fatiscit. Huc et illud retuleris, quod cum solutione vitrioli, Martis et Veneris, turbetur, atque tunc Acidum vitrioli, terram salis communis alcalinam corripit, et liberato Salis acido, metallum deiicit. Porro, quod Salis communis solutione, ne tantillum quidem mutetur; quæ cum omnia, tum singula, Salis communis effectus sunt proprii. Quod vero ad Salem amaricantem attinet, sciunt chymiae periti, tunc eum nasci, vbi acidum Salis, terram calcariam crassiore permeat, atque resoluit. Ceterum, geminae illius terræ, sali vtrique gignendo, idoneæ, alcalinae puta, et calcariae, quam in residuo thermarum, supra §. X. obseruauimus, Genesin, scrupulosius indagare, iam non vacat. Ex his, quæ diximus hætenus, nemo, nisi spagyricæ artis ignarus, non videt, frustra in thermis Trentsinensibus, siue Alumen, ad quod generandum, acidum non Salis, sed Vitrioli requiritur; siue Nitrum, aut Vitriolum, quod ex acido Vitriolico, Martem et Venerem imprægnante, prodit, atque solutionem Gallarum turcicarum, colore tingit nigricante; siue denique Martem, cuius nullum penitus vestigium in aquis nostris,

et harum

*eius indi-
cia:*

et harum *residuo*, notare potuimus, quæri solere. Neque eorum sententiam capio, qui *Solem* et *Lunam*, Thermis nostris inesse, opinantur: nisi fortassis de *Auri* et *Argenti* principiis, prout rebus omnibus inesse creduntur, id acceptum velint: certe *formaliter*, quod dicunt, nihil eorum deprehendimus, quippe de *formali*, rerum, thermas nostras ingredientium, *statu*, vnice solliciti. Proinde, *carent Thermae nostræ Alumine, Nitro, Marte, Sole et Luna.* *Sulphuris et Salis communis*, atque *amaricantis*, ex terra, partim *alcalina*, partim *calcaria*, nati, lapidis item *calcarii*, ista laus est, quæ Thermis nostris, intime permixta, vim eis, atque salubritatem mediam conciliant.

carent thermæ nostræ alumine, nitro, marte, sole et luna.

§. XV.

Ardua vero, et difficilis ad diiudicandum quæstio, superest, quomodo *Sal commune*, et *amaricans*, cum *Sulphure*, et *Terra*, coniungi queat, cum palam sit, *solutionem Salis communis*, cum *Sulphure communi*, neutiquam coadunari, aut solui posse. Ea propter, quæ nostra, in re dubia, opinio sit, prolixius paullo, promemus. Ita vero existimamus.

1) In confesso est, *Pyritem, Martialem* in primis, qui aëri expositus, dissilire consuevit, *Sulphur commune*, sibi coniunctum habere. Enimvero, parte, partis *sulphureæ*, seu *phlogistæ*, ignis beneficio expulsa, aut sponte diffugiente, *Vitriolum Martiale*, subnascitur: cuius *solutione*, in aqua facta, non solum *acidum vitriolicum* purum, sed et *acidum salis*, deprehendi potest. Namque *solutione* illa euaporata, et *crystallisata*, *Acidum* quidem *vitriolicum*, in *Martem* sese insinuans, in *Vitriolum* abit, *Magma* autem illud, quod *crystallisari* renuit, examine accuratiore peruestigatum, *Acidum salis* prodit, particulam quandam *Sulphuris* soluti, vna continentem.

Quomodo Sal commune et amaricans, cum sulphure, et terra, coniungi possit, disputatur.

tem. 2) *Alcali* soluit omnino *Sulphur*, quod demum in aqua solu m, partem *Sulphuris* exhalat, *Lunam* vero admotam, nigro colore inducit: pars enim *alcali*, in ista huiusmodi operatione volatilis redditur: id quod iam docebimus. 3) *Acidum Salis communis*, continet terram *arsenicalem*, vel si ita loqui velis, *alcali volatile*, quod sicuti notauimus, *volatile* redditum est. Igitur plane existimamus, copiosius *alcali* huiusmodi *volatile*, *Thermis nostris* inesse, cuius ope, *Sulphur* earum solvatur, detineaturque. Cum autem pars *sulphurea* cum *Alcali volatili* pedetentim diffugiat, residuum *Sulphur*, vinculo *alcalino* amisso, ab aquis separatur, eas turbat, atque subsidet. Neque enim aqua solui potest *Sulphur*, sine *Alcali*, neque in destillatione solutum transcendit, nisi Ducem habeat, nimirum *Alcali volatile*. Huc pertinent Celeberrimi FRIEDERICI HOFFMANNI, Præceptoris, ætatem Venerandi, Observationes: t) Paratur, inquit, ex *Sulphure*, cum sale *Ammoniaco*, et calce viua, vehementi arenæ igne, liquor, volatilis, urinesus, sulphureus, fumans, aurei coloris, qui volatilitate sua sulphurea, argentum inuolutum corio, vel multis chartis, flauo colore inficit. Paratur quoque ex eo atramentum sympatheticum, quod per totam chartarum libram operatur, et scripturam non apparentem, visibilem reddit. Liquor hic additus Mercurio, ipsum coagulat, quatenus ipse *Sulphur* arripit, cuius ramositate, et unctuositate, in fluore suo sistitur. Mirabilis huius Spiritus præparatio, iam tum nota fuit, Basilio Valentino. vide Currum eius triumphalem p. 92. Atque iterum: u) Si scorix dictæ (*Antimonii*) ex præparatione

t) In Adnotationibus et Additamentis ad Petri Poterii Opera Lib. II. cap. XI. de sulphure p. m. 553.

u) Loco eodem cap. XII. De Antimonio, p. 562.

zione, misceantur cum Sale Ammoniaco, et ex retorta adornetur destillatio, tinctura Antimoniæ volatilis, quæ x) aureo prodit colore conficitur. Egregie ista non illustrant modo, sed verosimilitudinem etiam conciliant opinioni nostræ, vinculum Sulphuris, cum Sale communi, et Amaricanti, Alkali volatile esse oportere. Accedit, quod et GLAUBERVS, Salem illum suum Ammoniacum secretum, qui ex acido Vitrioli, cum Spiritu urinae conficitur, atque ex reliquis etiam acidis, Nitri puta, et Salis, perinde confici potest, ad soluendum et destillandum omnis generis Sulphur, vehementer commendet. Urina enim, salem vehit communem et partes oleosas et sanguine secretas; in Spiritu autem urinae, alkali inest volatile, a pingui sulphurea parte productum. Hinc fit, ut acidum vitrioli, tanquam fortius, Alkali volatilifatum, arripiat, atque instituta sublimatione, vna cum eo transcendat. Quin et illud considerandum est, impensius, quod ad præparandum Salem Ammoniacum, fuligo, id est, phlogista ligni pars, urina, et Sal communis, requiratur, adeoque, pars Salis communis maxima, a pingui sulphurea parte urinae, iuxta et fuliginis volatilis facta, sublimia petat: quippe, cum certum sit, Alkalia volatilia fieri, non alia re, quam istis, quæ diximus, inflammabilibus. Deinde, si æstimauerimus ex quibus rebus, Sulphur, arte fieri soleat, in sententia nostra, haud vulgari- ter confirmabimur. Nempe, fit illud, ex Acido Vitrioli, et Oleoso, pingui, inflammabili, seu phlogisto, siue quomodo id cunque adpellare volueris, principio; ex hoc enim acido, et oleo aliquo destillato, enascitur Sulphur: item, ex acido Vitrioli, cum sale Alkali, coniuncto, ut liquefcere possit; et pin-
F guedine,

x) Eandem cap. VIII. p. 537. rubicandam prodire adserit.

guediue, ex regno quocunque *vegetabili*, *animali*, aut *minerali*, deprompta: Cum itaque *pinguedo urinae* ac *fuliginis*, ex animali et vegetabili regno, in præparatione *Salis armoniaci*, *alcali salis communis*, *volatile* reddat, minime abiudicari potest, eidem pinguedini, seu *inflammabili terræ*, quæ copiosissima *Sulphuri* inest, idem effectus *volatilisationis alcali Salis communis*, quod *Sulphur*, cum aqua coniungit, atque donec exhalet, solutum limpidumque detinere potest. Hæc nostra, de *vinculo Sulphuris*, et *Salis communis*, atque *amaricantis*, quæ in Thermis Trentsinensibus deprehendimus, sententia est. Qui certiora his dixerit, explorationeque, multum nos sibi reddet deuinctos. Nunc, *caloris* aquarum nostrarum, rationes, explicandæ forent; Sed quia contemplationem isthanc aliorum y) reiicimus: illud dixisse sufficiat; *frigidiores* nostras, intensius calere, quam *Vienenses*; feruentiores autem mitius, quam *Carolinas*: quod et IORDANVS aduertit: *Carolinis*, inquit, in *Bohemia*, *moderatiores* sunt, et *Viennensibus*, *efficaciores*. Hæc tenus, de Thermarum Trentsinensium natura.

Mem-

y) Puta, ad Lib. c. V. Hungariæ Nouæ Cl. MATTHIAE BELII, adfinis mei, cuius operi, pro virili nostra, iuvando, has istiusmodi curas, destinatas esse volumus.

Membrum III. MEDICVM.

De Thermarum Trentsinensium efficaci salubritate.

Synopsis.

IN Thermarum salubritate explicanda, quomodo versari statuerit auctor? *Iordani* de ea existimatio: inuidorum calumnia, notatur, et refellitur. § I.

Efficacitas calidarum nostrarum, *Sulphuri, Sali, et Terræ calcarie*, a priori describenda. § II.

Concordant observationes a posteriori factæ: *Iordano, Raygero et Mollero*, testibus. § III.

Neque refragatur experientia quotidiana: quibus morbis medeatur? § IV.

Morbi, quibus leuamen spondent, reliqui. § V.

Phthysicis, et Hydropicis sunt funestæ. § VI.

Lauationis tempora, *vernum, et autumnale*: thermarum effi-

cacitas, pro annorum temperatura, variat: ea de re coniectiones. § VII.

Quomodo lauaturi se parare debeant? curationis ratio, quæ? an maduersio in eos, qui illam susque deque habent. § VIII.

Erosio cutis, quomodo habenda: diætæ ratio, vniuersim spectata. § IX.

Specialiora monita, a perito Medico, poscenda: exacta lauationis tempore, quid facto opus? § X.

Efficacitatis Thermarum nostrarum, documenta varia: optatur stilicidium et vaporarium. § XI.

Epilogus. § XII.

§. I

*In Therma-
tum salubri-
rate expli-
canda, quo-
modo versa
ri statuerit
auctor?*

*Iordano de
ea existi-
matio:*

*viduorum
calumnia,
notatur, et
refellitur.*

SUPEREST, vt de *Salubritate* Thermarum Trentsinensium, dicamus aliquid, et quibus potissimum morbis, seu leuamen spondeant, seu medelam consummatam. Qua in re, ita versabimur, vt ad ea, quæ iam de natura calidarum nostrarum diximus, subinde respiciamus; longe ab eorum consuetudine alienissimi, qui non tam suo ipso- rum usu et experientia, quam vulgi sermonibus ducti, agyr- tarum ritu, multa subinde, atque aliena a fide, de calidis, quas ægri sui adamarunt, prædicant. Liberaliter de no- stris IORDANVS: *Plus, inquit, commodi hinc, quam a Vien- nensibus expectandum, quia calidiores erumpunt, licet Viros do- ctissimos Trentsinensium usum dissuasisse meminerim, solo rumore vano, aut fama sinistra motos, quod pauci lauantium, febres ef- fugiant.* Calumniam esse, partim ab inscitia, partim a ma- levolentia, eius ætatis Medicorum, profectam, nullum est dubium. Moris enim est multis, in primis vbi lucelli di- scrimen metuitur, vt vicinorum bona, malis adnumerent, saltem extenuent, vt, adperso vituperio, suis, quibus im- modice superbiunt, celebritatem concilient, atque ægros sibi obnoxios, in lucroso obsequio, detineant. Nobis pro- fecto, nihil istiusmodi hucusque innotuit. Ingenue IOR- DANVS: *Hoc, vt mihi neque compertum, ita, vel aliter se rem habere, neque adseruerim, neque negauerim.* Postea culpam, si quæ est, non in calidas, sed in lauantium, vitia coniicit. *At quid mirum, inquit, cum lauantes, ob incuriam, vel adfecta- tam negligentiam, nullo vti consilio, nullo præmisso examine, an suo morbo aque competant, nec ne? laxatis deinceps omnibus dietæ repagulis, spretis, quod maius est, Medicorum regulis, te- merario in eas se confecerant? Ita est, lauantium hæc vitia sunt,*

sunt, vt aquarum salubritatem, vel interuertant, vel certe in seipsos arment: quale exemplum supra, ex IORDANO, recitauimus.

§. II.

Tenendum vero ante omnia est, efficacitatem calidarum Trentsinensium, quanta quanta est, a *Sulphure*, copiosiore illo quidem, et *Sale*, qui paucior est, atque *Terra calcaria*, deriuandum esse. Nemo autem nescit, *Sulphuri*, constanter attribui solere, *balsamicam, nervis amicam, calefacientem, exsiccantem, roborantem, purificantem, anodynâque virtutem*. Proinde, mirum haud est, si vniuersalem hunc effectum, tam solidis, quam fluidis, corporis partibus, communicent thermæ nostræ. Solidis certe, iuxta et visceribus, robur atque tonum, egregie restituunt, et dum *sulphurea volatilis* pars, halitus forma, poros subintrat, calore thermarum commota, *sulphuream* sanguinis partem, eiusque circulum, audaugent; *serosam*, calefaciendo, subigunt, exsiccant, attenuant, resoluunt, atque ad hunc modum liberum expeditumque eius circulum efficiunt: qui dum solidas partes subit ac transit, hærentia istic *recrementa*, eluit, et discutit, atque sæpius ad loca *se* et *excretoria* adpulsus, eadem deponit, depuraturque. Ista, de efficacia thermarum nostrarum, *argumento a priori*, hoc est, ab iis rebus, quæ calidas ingrediuntur, sumto, dixisse sufficiat.

Efficacitas calidarum nostrarum, Sulphuri, Sali, et Terræ calcaria adscribenda.

§. III.

Neque aliud Veterum, iuxta et recentium. Observationes a posteriori depromptæ condocent: IORDANVS, cum *calculosis* medelam spopondit, *his*, inquit, *certum est, profuturas, præsertim si renes, et urinarii meatus, sabulo, aut*

Concordant observationes a posteriori factæ, IORDA. NO:

pituita referti fuerint: quia, præterquam calor, quod mulcet dolorem, etiam vias ampliores reddit, vteribus et renibus mollicatis, ut ampliores reddantur meatus, et calculo iter facilius ad excernendum pateat. Pergit IORDANVS: Non minus etiam Podagricis non deploratis, proderunt, si custodierint regulas, supra traditas, quia Sulphur absumet excrementa, et alumen corroborabit membra, ne alia suscipiant, paralytin soluent, si guttatim origini spinalis medullæ, sub occipite instilletur, ut per totam spinam defluat. En! Sulphuris virtutem! Nam quod alumen in subsidium vocat, id vero, familiari sibi errore, implicitus, facit, atramentum in niue quærens. Postea, quomodo contractis medeantur recenset. Contractis, inquit, etiam ob motum conferent: Nam præterquam quod calore, a sulphure, digirentur materia, beneficio alumini, nerui etiam exsiccabuntur et firmabuntur. Iterum sulphuris et lapidis calcarii vim et efficaciam, alumini adscribit: ceteroquin Demonstrationi nostræ, præclare velificatus. Atque ne RAYGERVS quidem aliter: Imprimis, obseruat ille, conferant membris debilitatis, aut contractis, item medentur arenæ et calculo, prosunt in affectibus mulierum, et præcipue in fluore albo, qui communiter nostras solet vexare fœminas. Ita et IORDANVS: Vterque affectibus frigidis conducent, albis profluuiis, etiam suffocationi matricis, sed non tempore paroxysmi. Certe, amicissimus nobis CAROLVS OTTO MOLLERVS, Medicorum, nostra ætate, apud Hungaros, Excellentissimus, eandem nobiscum sententiam init, dum calidas easdem in fluore albo, atque excretionibus subcutaneis, maxime commendat. Peculiarem præterea obseruationem nobiscum communicauit, quod apud hos, qui ad fluxum hæmorrhoidalem sunt dispositi, eundem cieant; minimum, tendentia illuc molimina, mitigent, et deiectiones eo pertinentes, sine exstanti rofione viscerum, oportune prouocent.

§. IV.

REYGE-
RO:et MOL-
LERO, tc-
libus.

§. IV.

Egregie cum his, quæ attulimus, quotidiana Medentium, non minus, quam ægrotorum, experientia, concordat. Enimvero, innumeris constat documentis, præclare calidas nostras iuuisse *Rheumaticos* et *Arthridicos*; tam vagis, quam fixis *Spasticis* motibus, male excruciatos: Nempe, *Rheumatici* adfectus, initio musculosas corporis partes occupantes, Germanis *Gallstus* dicti, facile in *Arthriticos*, iuncturas vexantes, degenerant, vel complicantur cum illis; ut adeo, cum iis medentur, hos, ne inualescant, prohibent omnino. In *Arthritide vaga*, *Chiragra*, *Gonagra*, *Podogra*, nec dum consummatis, *Coxendicum dolore*, *Malo Ischiadico*, *Nephritide*, opem ferunt egregiam, sed paroxysmo superato, saltem mitescente. Solantur præterea, *Hypochondriacos* et *Hystericas*, mensium item, aut hæmorrhoidum vitiis laborantes. Subleuant *cachecticos*, *ædematosos*, *infarctu lienis et hepatis adfectos*, *Ulcerosos*, *fistulosos*, *Calculosos*, *obesos herniosos*, *scabiosos*, et omnes *excretioni* cuidam *subcutaneæ*, obstipationibus viscerum, et glandularum abdominis, obnoxios. Auxilio sunt *sterilibus*, si vitium, non a partium conformatione, sed inductis aliunde adfectibus, oriatur. Medentur *fluori albo*, et *Gonorrhææ*, benignis, de quo IORDANVM, et RAYGERVM, audiuius. Atque horum quidem morborum alios, si ex Medici præscripto, cum cura fuerint adhibitæ, prorsus edomant, tolluntque; alios leniunt, neque non ita mitigant, ut rarius recurrant, saltem non æque adficient ægros.

Neque refragatur experientia quotidiana.

quibus morbis medentur.

§. V.

His præterea, qui *Apoplexia* tacti aliquando fuerunt, adeoque, partis adfectæ *Paralysi* ac debilitate quadam, laborant,

Morbi, quibus leuamur, spondent, reliqui,

borant, præcipue, si viuidiori adhuc, et medicationum capace sint natura, opem ferunt singularem. A *Contractis*, *Trementibus*, *ulcerosis*, *fistulosis*, *ædematosis*, *Cachecticis*, *Calculosis*, *obesis*, *Herniosis*, *Scabiosis*, et impuritate corporis alia *fædis*. *Fluore* item *albo* et *Gonorrhæa* benignis, *Colica inueterata* adfectis, etiam extra solita lauationis tempora, hoc est, æstate, atque hyeme, *curatiue*, bona cum fruge adhibentur. Quin et *arthriticis* inflammatione et doloribus mitescentibus, *curatiue* suadentur; tumorem enim, qui ex debilitate partis adfectæ natus fuit, penitus depellunt, *tonumque* roborant. Sed dolore, et inflammatione adhuc præsentibus, nemo iis temere vsus fuerit, nisi valetudini suæ proterue infensus. Tametsi enim robustioribus, et qui sunt sensu obtusiore, non raro, et in ipso *paroxismo*, non modo nihil incommodi intulisse, sed profuisse etiam, obseruatum sit; iis tamen, qui habitum corporis nacti sunt delicatorem, atque inde sensus sunt exquisitioris, malignitate, ab extremis ad interiora intempestiuius repulsa, noxiæ exstiterunt. Enimuero, funestos sæpe euentus, retropulsa *podogra*, dare consuevit, quin mortem ipsam accelerare. z) Quibus igitur valetudinis, imo vitæ potior est ratio, quam dolorum, breui transitorum, vehementer sibi cauebunt, ne se euentui dubio, ac plerumque in mortem lentam desinente, temere permittant.

§. VI.

z) Similis, ex istiusmodi thermarum nostrarum vsu, expectari potest effectus, qualem ex decantato illo *Empyricorum Spiritu Antipodagrico*, qui ex *Sulphure*, *Sale ammoniaco* et *Calce viua*, paratur, prudentiores obseruarunt. Illinitus nempe, dolores quidem tollit, sed *podogram* stupidam, inflammationes viscerum nobiliorum, colicam et pessima quæque, sæpius ægris inducit.

§. VI.

In istis, quos edisseruimus, morbis, haud spe sua frustrabuntur ægri, si curam adhibuerint, temperamenti, et morbi naturæ, conuenientem. *Phtysicis* vero, et *Hydropicis*, non profuisse, longiore eorum experientia *aa)* animaduersum est, qui siue ipsi vsi sunt thermis nostris, siue aliis, vsum earum præscripserunt. De *Hydropico*, IORDANVS adnotauit. *Senem, inquit, aqua intercute laborantem, in gradu, quo in lacum descenditur, prostratum, vidi, solo capite exerto reliquo corpore, aquis immersum: qui a me quæsitus, num quid emolumentum acciperet ex aquæ usu, mirum in modum eas collaudauit. Vereor tamen, ut fuerit superstes, cum excessisse mihi videretur annum sexagesimum, et biduum solum illis lauabat, quo nunquam egressus dicebatur. Credo equidem, sensisse aliquod morbi lenimentum, donec aquis inerat, natiuo earum feruore concalefactus; sed an constans ista fuerit efficacitas, est cur ambigas; eo quod Sulphur, tumorem quidem propellat, sed ad interiora abdominis; vt habeat omnino hic locum dictærum vulgi: Wenn ein Wassersüchtiger ins Bad gehet, so nehme er nur den Sarg mit sich.*

*Phtysicis
Hydropicis
sunt fung*

§. VII.

Ceterum, lauandi tempus, idem hic esse consuevit, quod alias, Thermas frequentantibus, definitur. *Vernum* Mense Maio init, atque in adultum vsque Iunium, protrahitur. Sed *auctumnale*, cum exeunte Augusto cœpisset, ad

*Lauationis
tempora,
vernū et
auctūnal*

G

finem

aa) Monuit Dominus GLVDOWACS Apothecarius Collegii Soc. Ies. Trencsinensis, vsu viginti pluriumque annorum edoctus.

Thermarum
efficacitas,
pro anno-
rum tempe-
ratura,
variat.

ea de re,
coniecta-
tiones.

finem *Octobris* produci solet. Plurimi lauantium, *ver* deli-
gunt, *autumnus* pauciores, quod illic vireſcant omnia, et
naturam, hyemis rigore quasi effoetam, blandissime refouent;
hic vero, tristem iterum brumam minentur singula. Vtri-
que tempori, sua laus est, at potior tamen verno. Qui ex-
tra hæc tempora, lauatum huc concedunt, plerumque ne-
cessitate coacti id faciunt. Sunt, qui existiment, non eandem
Thermis nostris, annis singulis efficacitatem esse, verum,
pro diuersa anni temperie, diuersas, saltem non æquales,
ad medendum vires, indipisci. Nihil reluctamur opinioni;
nam et IORDANVS, incolarum hanc querelam, adnota-
uit. *Quibus, inquit, thermarum vires ante exploratæ fuerant,*
ignauiam earum, hoc anno, culpabant; quod licet in occultam
aliquam vim et influentiam referrent, mihi mirum non fuit,
quod totus hic (MDLXXIX) ἀνόμαλος, inæqualis, inquam, nus-
piam sibi constans fuerit. Vnde minime mirum, tot imbribus
Austrinis, etiam aquas esse corruptas, cum omnia, terra nascent-
tia, celi inclementiam, persenserint. etc. Si verum est, eas-
dem, saltem consimiles, in intimis terræ visceribus subse-
qui vicissitudines, quæ in aprico accidunt, non erit amplius
de aquarum variante efficacia, dubitandum. Quia enim
tota hæc Vniuersitas rerum, causis, quas naturales voca-
mus, varie concurrentibus, vel effoetior in annos singulos
redditur, vel foecundior; prouum erit coniicere, eandem
hanc temperaturam, et terræ adytis, communicari. Hoc
vero si est, nihil erit facilius, quam vt subterranei ductus il-
li, qui calidis nostris meatus præbent, plus minusue aquis
communicent, de iis quæ aquis natiuam illam, atque medi-
cam ingenerant efficaciam. Idem circa fontes salubres ob-
seruatum ab aliis meminimus. De *Altenburgensi*, apud *Au-*
striacos; certum est atque exploratum, in annos singulos,
aqua

aquarum virtutem notabiliter variare. Cuius rei causas proprias, neque longe petitas, si indagauerint rerum harum curiosi, non exiguum operæ pretium fecerint.

§. VIII.

Sed eo redeundum est, vnde digressi sumus. Qui Thermis nostris, rite vti volet, ita, sicuti oportet, præparatus accedat. Nimirum, *uniuersalia*, quæ dicunt, præmitti necesse est. Sunt hæc, *euacuationes*, quæ, quod satis est, e corpore euehant, neque naturam, vti accidit subinde nimium debilitent: porro, *Vena sectiones*, pro diuersitate habitus corporis *phletorici*, et consuetudine, iam ante adscita. Talia, qui negligunt, non modo nihil ex thermarum usu, capiunt utilitatis; sed multis etiam malis semet ipsos implicant. Huc referas: *pectoris oppressiones*, *angustias præcordiorum*, *hypothymias*, *Cephalalgias*, *vertigines*, atque alias *congestorias restrictiones sanguinis*, quin et *febres*, quas thermarum vitio lauandis induci, IORDANO teste, maleuoli criminantur. Sed quid facias hominibus, alias, sine Medici præscripto, viuere adsuetis? Vbi vero, quæ diximus, debite præmissa sunt, habenda iterum, temperamenti cuiusque, et infirmitatum, ratio est: feruentiori ne illo, an remissiori balneo, vti conducat magis? De his, vbi, quod e re visum est, statuit lauaturus, ipsum lauationis ordinem, rite definiet. Curatio vniuersa, nisi desultorium sit balneum, tribus circiter hebdomadibus, absoluetur; pluribus, si malum inueteratum edomandum fuerit. Atque tunc lauationis tempus, a media hora incipiens, atque in dies, singulis horæ quadrantibus, augescens, ad bihorium vsque *bb)* procurret.

Quomodo lauaturi se parare debeant?

curationis ratio, quæ?

bb) Præstabit nihilominus, si suo se quisque modulo metiri dixerit; cum sint, qui horam vix durare possint; alii vero, duas pluresque horas, siue molestia, laueat.

curret. Quod ubi adsecutus est, plures dies, duabus horis lauacro immorabitur, tandemque iisdem, quibus ascendat interuallis, iusto ordine, ad eam, a qua coeperat, ordinis mensuram, redibit, atque eum in modum lauationi finem imponet. Horis autem meridianis, lauacrum intraturus, iusculum, sed dilutum, neque pingue nimis, sumet, cui, si quis potionem *Thee*, vel *Caffee*, substituerit, consuetudine forte sua ductus, nihil eum morabimur. A prandio, id præcipue aduertendum est, ne ante cibi, quem sumseris, concoctionem, hoc est, tres fere post pastum horas, ad thermas accedas, quippe non stomacho tantum nociturus, sed et toti *œconomiae sanitatis*. Ut adeo, digni sint animadversione, qui non modo prandii tempus, iusto diutius protrahunt, gulæ nimium indulgentes; sed ex pleno adhuc ventre, quin vino et sudore, ex choreis, quas subinde adparatas habent, madentes, in balnea se proiiciunt, illic poculis, bacchabundi, certant, atque non modo thermarum efficacitatem interuertunt, sed morbos sibi etiam accelerant, iis graviores, quam quos ad thermas secum attulerunt. Quibus itaque valetudo, sicuti oportet, curæ est, operam dabunt, ut se ab ista intemperie abstineant, neque siue naturæ beneficio, in suam perniciem abutantur, siue nouis calamitatibus corpus, pessimo consilio, exponant. Sollicite ergo prouidendum erit, ut præter moderatam *diætā*, alius aperta sit, quæ si non succedat, tertia, vel quarta die, mane vel vespere, *lenituum* aut *leue laxans*, sumendum, ex *salibus digestiuis*, *nitro*, *Cremore Tartari*, *Tartaro Tartarizato*, *Sale Anglico*, *Magnesia nitri*, *Sennatis*, *Rhabbarinis*, *Syrupis florum Persicorum*, *Rosarum*, *Mannatis*, *oleosis* etc. atque tunc si alius cieri occipiat, mane, vel a prandiis, balneo abstinendum. In eundem finem inseruiunt,

cibi

animaduer-
sio in eos, qui
eam susque
deque ha-
bent,

cibi aperientes, *Spinachia*, *Asparagus*, *Pomafrixa*, *Gelatina*, et similia, quibus tanquam *dieteticis*, naturæ amicis, alius fit lubrica. Qua prouidentia opus haud est, si alius sponte respondeat: vtile nihilominus fuerit, semel atque iterum lauationis tempore, *lene* quoddam *laxans*, sumsisse, atque illis diebus abstinuisse balneo.

§. IX.

Quodsi accidat, sicuti solet omnino, vt sub lauandi tempus, cutis erodatur, et in rubicundas maculas efflorescat; continuanda eousque lauatio est, dum sine medicatione alia, solius vsu balnei, sponte, hoc, quidquid est, *excretionis*, secesserit. Qui molestam hanc efflorescentiam vitare voluerint; est enim cum exquisitissimo doloris sensu coniuncta, apud eos potissimum, quæ delicatiore sunt cuticula; tertiam illi diem, a balneo vacuam habebunt. Lauacro egressis, quietem, vnius alteriusue horæ quadrantis, suademus; ne sanguis concalesctus, vel refrigeretur, subito, corpore libero, aëri intempestiuus exposito, vel magis etiam concitetur, motu quodam vehementiore. Proinde, corpus in lectulum tantisper reclinandum erit, quin tegulis etiam, si id aëris asperitas requirat, iniectis, fouendum, donec æqualis sanguini circulus inducatur. Neque nocuerit, *infusum herbe Thee*, aut iusculum bibisse, vt ea quoque ratione, *transpiratio* auctior, promoueatur. Ita curato corpore, animus, solitis curis, laxetur, oportet. Hinc quærendi familiares conuictus, deambulationes moderatæ, et si qua sunt hilaritatis, honestæ illius, et quæ corpus animumque recreat, non fatiget, adminicula alia. Modicas, aliqui, choreas, suadent, si quid tamen iis

Erosio cutis, quomodo habenda

dieta ratione vniuersim spectata.

modici inesse potest. Quos enim saltandi libido, semel corripuit, nullus his modus poni potest, donec cupiditati penitus litauerint, ingenti subinde valetudinis, vt alia taceamus, intertrimento. Cibus, ad ventriculi ingenium, et habitum corporis, adparetur, necesse est, summaturque, non ad ingluuiem, sed ad rubor: quod de potu etiam dictum velim, largiore quidem eo, et ad hilaritatem quandoque, nunquam ad ebrietatem, hausto. Prandii, atque Coenæ, stata sint tempora, neque ea producenda longius, ne seu lauationes postmeridianæ intempestiuius instituantur, seu arctiora reddantur nocturnæ quietis tempora. Somnus enim temperatus, quemadmodum alias, ita cumprimis in thermis agentibus, multum ad valetudinis, siue conseruandæ, siue recuperandæ curam, conferre posse putandus est. De Veneris vsu, tritum illud recitasse sufficiat:

*Balnea, vina Venus, corrumpunt corpora
nostra,
Conseruant eadem, balnea, vina Venus.*

Proinde, quo abstinentiorem se lauator præbuerit, eo certiore salubritatis efficaciam sibi pollicebitur:

*cc) Nam non vlla magis vires industria fir-
mat,
Quam Venerem et cæci stimulos auertere a-
moris.*

Sed

Sed mulieribus, quæ in menstribus sunt, quid suadeam, non habeo. Certe plures deprehendi, quibus lauationis tempore, bene ac largiter respondebant menstrua, quam quæ suffocata, saltem impedita, questæ fuissent: quapropter ulteriori id quidem experientiae committendum, reor.

§. X.

Generalia hæc sunt: *Specialiora*, et quæ ad morbos *Specialiora* quosuis pertinent, a Medico repetenda sunt, perito eo, et *monita, a* non minus indolis thermarum, quam morbi, et eius, qui *perito, me-* hunc patitur, naturæ, bene gnaro. Tametsi enim, ea, *dico, poscen-* vnumquemque prudentia esse oportet, vt, longiore obseruatione doctus, norit, quid sibi seu conducatur, seu noceat; tamen, quam optime collocatam fore putamus Medici operam, si cuique, quod opportunum maxime, maximeque salutare visum fuerit, præscribitur. Exempli gratia: apud *Calculosos*, internis medicationibus vias relaxari, et ad excernendum disponi, necesse est: Apud *Arthridicos* et *Hypochondriacos*, multa, per vrinam, *recrementa* secedunt, atque ideo natura, ad proniorem eiectionem inuitanda est, iuuandaque: in *fluore albo*, aut impeditis menstribus, subueniri potest *emenagogis*; et sic porro: diæta sollicitiore, et quæ morbi ingenio conueniat, nunquam non, quam curatissime, obseruata. Ceterum, lauationis tempore rite exacta, *euacuans* summatur, oportet: adhibeatur porro, balneum aquæ fluuiatilis, aut fontanæ, quo Sulphur, corporis superficiei, immo poris intimius hærescens, elui possit. Neque suffecerit, semel tantum, aut, cum vis morbi aduersit, thermis nostris sic vsum fuisse; redeundum

dum iterum est, atque id, si fieri possit, statis in singulos annos, temporibus: etiam tunc, vbi de morbo securi sumus. Solet enim natura, semel iterumque, lauatione huiusmodi, restituta, corroborata, quasi reminisci quodammodo temporis, quo beneficio illo maestam semet sensit, atque medicationem eandem, variis in corpore moliminibus suscitatis, postliminio reposcere: vnde postea, nisi prompte ei respondeatur, graues quandoque morbi, neque facile medicationibus aliis subigendi, conflantur. Atque hac illa causa est, cur bene valentibus nonnisi desultorium calidarum vsum suadere soleamus: *Sanus enim homo, qui et bene valet, et sua spontis est, nullis se obligare legibus debet, neque Medico, neque Iatrolepta indiget*, inquit CELSVS dd). Hoc, quibus curæ haud est, difficultatibus se implicant, haud facile superandis, cogunturque sua culpa, experiri, *medice viuere, reuera esse mendice viuere.*

§. XI.

Efficacia-
tis Thermo-
rum nostrarum,
documenta va-
ria.

Reliquum est, vt documenta quædam, salubritatis Thermarum nostrarum exhibeamus, partim a nobis obseruata, partim communicata ab aliis. Et in *paralysi* quidem, quam præsentaneam opem tulerint, *Magnifico Domino D. Bliimero*, res ipsa loquitur. *Excell. Dominus D. Gelhard*, amicus noster, *Paralysin*, ex antegressa *Apoplexia*, residuam, sublatam vidit. Ipse ego, vere proximo, *Paralyticum*, balneo illatum, quatruidui post spatium, pedibus, sine adminiculis, incedentem, conspexi: *paralyticum* alium,
ex

ex colica hæmorrhoidali, male tractata, talem factum, in melius restitutum noui: quin et fæminam, eodem morbo, ex hemiplexia prægressa, adfectam, eo vsque redintegratam scio, vt nemine opitulante, ingredi potuerit. Sacerdos S. I. colica inueterata laborans, laudati Domini Gelhard consilio, id ex thermarum vsu retulit, vt malum illud depelleretur penitus, segniusque in posterum rediret. Oedema pedum apud virum sexagenarium, eumque cachecticum, calidis nostris sublatum est. Femina calculosa, continuato aliquantis per balneo, calculum, copioso comitatum sabulo, excreuit. Plures aduersus Podagricos dolores, vsu aquarum nostrarum, egregie, quotannis se præmuniunt, gressum indipiscentes firmiorem expeditionemque. Excellentissimus Mollerus, hæmorrhoides, ante hac respondere nolentes, fere sine sensu, lauationis tempore, successisse obseruauit. Quin et fluore albo cessante, menstrua in ordinem reuocata, sincerum dedisse sanguinem, meminimus. Peculiare est, quod apud Legatum Præfecti militum, Locum tenentem vocant, adnotauimus. Laborabat is ex malo Ischiadico, cui pellendo, Medicastrî suasu, saluationem adhibuit, qua superata, cum suspicio esset, Mercurium haud prouide satis e corpore educum esse, nouam is saluationem subire nihil dubitauit. Secuta inde sunt pathemata varia, eaque refractaria, pedum præcipue, motus ceruicis spastici, scapularum et nuchæ exquisiti dolores, cetera. Ad Thermas nostras delatus, cum dies complures vsus iisdem fuisset, sponte eidem salua cieri denuo cœpit, vt non secus expueret, ac si tertium, molestissimum medicationis genus subiisset. Sputum egestum, et aëre siccatum, puluerem referebat, calci viuæ simillimum. Lauatione sic continuata, egregie ab iis,

ptatur sti-
cidium et
vapura-
rium,


diximus, *pathematibus*, conualuit. Longum foret singula, quæ nobis innotuerunt, conscriptari. Ista certa sunt et nostra ipsorum fide explorata. Vtinam sperari posset, ut lauacris, qualia iam sunt, *stilicidium* adderetur, et *Balneum Laconicum*, siue *vaporarium*: in quo ex halitibus calidarum, sudores prouocarentur; *Dolendum*, inquit IORDANVS, tam prestantes aquas solis lauantibus inseruire, inopia domiciliorum, cum tam potu, quam *stilicidio*, maiorem rebus humanis utilitatem præberent, quam quæ a sola lotione expectari posset. Immo foueæ, cauernæ, et stubæ, hic institui possent, cum calidæ scaturiant aquæ: sed vita et incolumitas a nobis tantæ non fit, ut ab iis nationibus, quæ sanitatem omnibus fortune bonis anteferunt: idcirco eius conseruandæ, aut amissæ recuperandæ studio, nihil intentatum relinquunt, etiam circa thermas, sudatorii et vaporariis, non paruo sumtu exstructis. *Supervacuum* igitur visum erat, hic loci, de aquarum usu differere, quem bibeutibus aut *stilicidia* adhibentibus, præstant, quandoquidem loci solitudo, et negligens cultura, obstat, quominus in usum adhiberi possint: sat erat, utilitates, quas lauantibus præstant, enarrare.

§. XII.

Epilogus.

Hæc vero sunt, quæ de *Thermis Trentsinensibus*, pro mea virili, dicere habui: plura licuisset, nisi certa explorataque dare maluisssem, quam copiosa. Neque tamen ita mihi placeo, ut credam, opella hac mea, tametsi attempta ad verum, naturam, atque utilitates *Thermarum Trentsinensium* omnes, exhaustas esse penitus. Erunt, bene multa, quæ addi his nostris poterunt, si usus diuturnior, et sollicitior observatio, ea, qua par est, adcur-
ratione

ratione instituta, accefferint, quam ego diligentiam, Medicis patriæ nostræ non minus commendo, quam ægrorum curam; quippe haud ignarus, quantum istius modi naturæ beneficia, rite expensa, momenti habeant, non solum ad *praxin clinicam*, sed vniuersam etiam rei medicæ *Θεωρίαν*, amplificandam ornandamque: Vt profecto mirum sit, in tanto Thermarum Hungariæ numero, longa retro ætate, nihil elaboratum fuisse, a viris, quos patria nostra, subinde habuit, Excellentissimos, siue medendi artem spectes, siue rerum, ad eam pertinentium, peritiam. Nobis, Thermas Trentsinenses, quomodocunque cognouisse, voluptati fuit. Faxit Numen æternum, vt labor iste bene vertat, mereaturque, si non Obtreſtatorum, saltem bonorum Adprobationem.



The first part of the paper is devoted to a general
discussion of the problem. It is shown that the
problem is equivalent to the problem of finding
the minimum of a certain function. This function
is then shown to be convex, and the minimum
is found by the method of steepest descent.
The second part of the paper is devoted to a
detailed discussion of the method of steepest
descent. It is shown that the method is very
efficient for finding the minimum of a convex
function. The method is then applied to the
problem of finding the minimum of a certain
function. The results of the calculations are
given in the following table.

